

- **Editorial: ENN GVERNMAN AVEK ENN MANK TOTAL VIZYON3**
- **LALWA BHADAIN: NUVO DANZE FASISM ek PLIS KORIPSYON 5**
- **KANPAYN ANFAVER LANGAZ KREOL DAN PARLMAN11**
- **SIKSE PREMYE FESTIVAL FIM PALESTINN19**
- **ONG ki fer ditor?.....29**
- **ATANTA PARIS32**
- **KISANNLA BAKING ISIS ?.....34**



- **DANZE SMART CITIES14**
- **FAM ANFAVER PRODIKSYON ALIMANTER KONT SMART CITIES.....17**

KONTENI

Nimero 121

Des 2015 - Zan 2016

EDITORIAL: Enn Guvernman avek enn mank total vizyon	3
Jabaljas ek Bulbak	4
Lalwa Bhadain: Nuvo Danze Fasism ek Plis Koripsyon ankor	5
LALIT an Aksyon: Bilan LALIT 2015	7
Kanpayn anfaver Langaz Kreol dan Parlman	11
Let Uver a Premye Minis	12
Jugnauth: "Langaz Kreol deza servi dan Parlman!"	
Bérenger: "Inevitab langaz Kreol rant dan Parlman"	13
Danze Smart Cities	14
LALIT websayt: Enn milyon hits dan dernye 6 mwa	16
Fam anfaver Prodiksyon alimanter, kont Smart Cities	17
LALIT opoz menas Gayan lor obligasyon prezant ID Kard Lopital	18
Dr. Madhewoo gayn Fever pu Fer Lapel lor ID KARD	19
Sikse pu Premye Festival Fim Palestinn	19
Let Uver a Premye Minis lor Palestinn dan kad Zurne Internasyonal UN	20
Enn Kritik lor Stratezi "Gender Empowerment" par Lindsey Collen	23
Kwin Lasante: Ki ete maladi Kanser?	26
LPT Ians "The Book Lover"	27
Bhagwan, Subron ek Guvernman Lepep pu "Sov lindistri Sikriyer"	27
Kwin Iar: Nuvo Galri dan Port Louis: ICAIO	28
Poem lor Premye Vizit Galri Lar	28
Inkrwayab me Vre: O.N.G. ki fer Ditor?	29
2yem Let Uver LALIT a Olivier Bancoult	31
Atanta Paris	32
Kisannla Baking ISIS	34
Lerop Fas-a Kriz Refizye	34
Indonezi: 50 an depi Masak par Leta ki tuzur la	36
Enn Larut, Enn Sintir: Lasinn etann so rezo trin	36
Remonte Le Pen an Frans: Gran Danze	36

Pibliye e inprime par LALIT, 153 Rut Rwayal, GRNW, Port Louis, Repiblik Moris. Pri Rs20/-

www.lalitmauritius.org

208 2132 ek 208 5551

lalitmail@intnet.mu
YouTube Chanel: lalit mauritius
SoundCloud Chanel: lalit mauritius

Enn Guvernman avek enn mank total vizyon

Lalyans Lepep finn opuvwar pu enn an. Alor li apropiye ki nu etabli enn bilan de seki zot finn fer, ek seki zot pa finn fer, sirtu par rapor ek program ki zot ti prezante dan kanpayn elektoral Desam 2014, Diskur Prezidan, ki Purryag ti lir, diskur bidze Lutchmeenaraidoo, e diskur Vizyon 2030 PM Jugnauth.

Me li pa dan nu lintansyon pu fer enn lalist promes e enn lalist proze ki finn konkretize. Buku bann proze zot etale lor enn long peryod, ek apre enn an zot ankor rest o-nivo proze ki pankor demare.

Kot kreasyon lanplwa?

Seki pu pli interesan se gete dan ki mezir sa guvernman la ena koerans politik e programatik pu fer seki zot pe anvi fer, dan ki mezir Guvernman finn etabli priorite dan seki li finn demare par rapor a devlopman ekonomik e mezir irzan ki nesaser.

Tu dimunn zordi dakor ki se lanplwa ki reprezant premye priorite: nivo somaz, sirtu pu zenneprofesyonelpeogmante. Ziska ler okenn nuvo sektor ekonomik ki kree lanplwa lor enn gran lesel pa finn demare: o-kontrer dan plizyer sektor finn ena lisansiman. Me sirtu guvernman pa paret ena okenn lintansyon pu reflesi lor kreasyon lanplwa dan sektor kuma diversifikasyon agrikol, prodiksyon manze, e lindistri transformasyon prodwi agrikol. Se selman dan enn tel sektor ki kapav ena kreasyon lanplwa masif a kur-term. Me olye kumans enn refleksyon lor nesosite sa diversifikasyon agrikol e reform agrer, nu truv

guvernman Lalyans Lepep pe kontinye ankuraz kann-disik-melas-bagas. Sa li malgre lefet ki apre 2017, ek reform ki Lerop pe amene dan sektor disik, li pu vinn deplizanpli pa rantab pu kontinye akapar tu later agrikol ek kann. Deza par milye planter kann pe abandonn kultivasyon zot later.

IRS/ERS, Smart Cities

Guvernman pe met buku lanfaz lor so proze kreasyon enn nomb seki li apel “smart cities”, me ki an verite enn kontinyasyon stratezi IRS-ERS ansyen rezim. Trwarkar bann inite lozman dan sa bann “smart cities”, pu vande ek etranze; zis enn kar pu rezerve pu klientel lokal e pu “diaspora”. San konte ki ankor later agrikol pu betone ubyen pu transforme an terin golf. Kreasyon lanplwa dan sa bann smart cities pu byen marzinal, e sirtu li pa pu lanplwa prodiktif.

Lot gran proze guvernman se agrandi lepor ki sipoze pu al depi GRNW ziska Be Di Tonbo. Apre enn an, ankor pe negosye ek Dubai Ports World pu invit zot pu vinn partisipe dan sa devlopman la. Travayer Lepor ena rezon pu mefye sa plan pu donn Dubai enn kontrol lor enn sektor stratezik kuma lepor. Me sa proze la osi li paret pu enn lavenir ase lwintin ki pa pu kontribye buku pu kreasyon lanplwa a kur e mwayin term. Guvernman pe alwe buku resurs a sektor PME, kot lanplwa byen preker e malpeye. Deza sa sektor PME anlway plis ki 40% mindev

dan Moris e Rodrig: deza sa 40% la travay dan enn prekarite total, kan nu kone ki apre 4 an 80% PME fer fayit.

Mezir populist

Kan Lalyans Lepep ti prezant so program avan eleksyon, nu dan LALIT nu ti analiz program la kuma sinpleman enn lalist mezir populist ek enn seri lanons ki pa reflet enn program koeran ki realizab a kur e mwayin term. Se seki nu finn truve dan dernye enn an: guvernman finn aplik serten mezir ki ti lor so lalist, kuma ogmantasyon pansyon vyeyes ek konpansasyon saler iniform, kuma eliminann permi-a-pwin ek lekel buku dimunn pa ti dakor.

Mank koerans

Me apre enn an nu konstata ki danguvernmanpenasakoerans ki nesaser pu implemant enn veritab program devlopman ekonomik. Alor guvernman finn konsantre lor enn program “netwayaz” ki viz pu expoz e demantle politik “demokratizasyon lekonomi” ki rezim Navin Ramgoolam ti servi kuma enn slogan pu favoriz seki ti pros politikman (ek sosyalman) ar ansyen rezim. Sa program netwayaz finn ena enn dub rol: pretann ki minis kuma Bhadain (BAI) e Soodhun (later) pe kas enn gran pake, me an mem tan sa finn konsantre latansyon medya e dimunn an zeneral lor dega ki ansyen rezim finn fer dan dernye 10 an. Alor pa finn ena sa kudey kritik lor prezan guvernman so bann mankman programatik.

Kan zafer BAI e ka kont

minis ansyen rezim kumans nepli atir latansyon dimunn, lerla guvernman vini ek Lalwa Bhadain e deter Gorah Issack pu terminn zot premye lane ek ankor plis lekran lafime.


Enn fakter ki finn kree enn dezikilib dan Lalyans Lepep, se kondanasyon Pravin Jugnauth ki lerla finn oblize demisyone kuma minis. Pena okenn dut ki proze politik klan Jugnauth finn deraye, ek sa finn ena enn lefe negatif lor koerans guvernman Lalyans Lepep.

Ena osi lefet ki Lopozisyon Parlmanter fas-a Guvernman Jugnauth finn byen fragmante, e parfwa oportunist. Alor febles politik e programatik guvernman pa finn ekspoze dan parlman.

Konklizyon

Lopozisyon a sa guvernman ki apre enn an finn perdi buku kredibilite, li pa pu vinn depi lopozisyon parlmanter ubyen depi birokrasi enn muvman sindikal ki pena enn platform anti-kapitalist. Lopozisyon pu vini kan nu reysi batir enn muvman ki defann enn program sosyalist ki permet lamas dimunn mobilize pu reklam plis demokrasi, pu reklam enn politik ekonomik ki vremem dan faver lepep.

5 Desam 2015



Jabaljas ek Bulbak



Jabaljas: Dir seki to ule, Bulbak, to bizin admet ki sa Minis Soodhun la, li enn zoro dan minis sa.

Bulbak: Eta Jabaljas, to apel Minis Soodhun enn zozo.

Jabaljas: Ayo Bulbak, mo finn dir zoro, z-o-r-o; ki manyer to finn tann zozo.

Bulbak: To kone Jabaljas, manyer ki Soodhun anvol-anvole depi zafer enn minister ziska enn lot, ek manyer ki li tultan pe gazuy-gazuye, samem kitfwa mo finn tann zozo, z-o-z-o.

Jabaljas: To kone, Bulbak, san Soodhun, sa guvernman ti pu paret pe buz fix e pa fu nanye.

Bulbak: Anfin, laplipar dimunn konsidere ki sa guvernman Lepep la vremem pe buz fix e pa fu nanye. Alor dapre twa, se Soodhun ki responsab pu tu seki guvernman pe fer? Explik mwa enn ku kimanyer sa.

Jabaljas: Ala mo pu eksplik twa: Soodhun li Minis Lozman ek Later. Purtan ki sann la okip pelrinaz Lamek?

Bulbak: To ena rezon: pa zis li fer geyn plis viza ek al Lamek kan finn ena buskilad trazik, me li osi fer bes tarif avyon.

Jabaljas: Purtan tarif avyon, sa li su minister Xavier. Aster dir mwa, ki sann la pe negosye pu 300 zenn dokter geyn travay dan Larabi Seoudit?

Bulbak: Ondire li pe pas lor latet Minis Lasante Gayan.

Jabaljas: Aster, tu dimunn plenyen ki lavyann kut tro ser e Minis Lagrikiltir pa fute fer nanye. Ki sann la enn ku finn fer bes pri lavyann, pa zis bef pu Qurbani, me muton ek kabri usi?

Bulbak: Ondire li vremem ena enn baton mazik.

Jabaljas: Kan CCID fer aret Shakeel, ki sann la ki finn met Jangi dan so plas, malgre ki se Xavier ki an sarz lapolis an tan ki PM pi.

Bulbak: To ule dir Soodhun finn met Xavier dan so plas.

Jabaljas: Absoliman. Me ena plis ki sa: enn Dimans Soodhun anonse ki 12,000 travayer tekstil pu lisansye dan Phoenix, so sirkonskripsyon. Tu dimunn panike. Lerla 2 zur apre, Soodhun anonse ki pa zis li finn reysi sov lanplwa sa 12,000 travayer, me li pe kree 12,000 nuvo lanplwa pu gradye dan sa mem sekter tekstil. Ek li anons sa dan prezans minis lanplwa e minis lindistri ki pe asize kuma vazafler akote li.

Bulbak: Selman Jabaljas, pena to parey pu gob tu mirak ki Soodhun anonse.

Jabaljas: Dir seki to ule, me to bizin admet ki Soodhun fer lezot minis paret kuma bann inkapab. Me ena enn kitsoz ki mo pa tro konpran.

Bulbak: Mo sipoze to pa konpran ki manyer sa bann lezot minis la aksepten ki Soodhun mars lor zot platbann e fer zot pas pu bobok.

Jabaljas: Ekzaktaman!

Bulbak: Ala mo pu eksplik twa: kan bolom Jugnauth pa dan peyi, li met Soodhun ansarz, an tan ki Vis Premye Minis depi pli gran parti dan Lalyans Lepep. Wadire Soodhun pe ranplas tanporerman Pravin ki pa disponib pu rezon ki to kone.

Jabaljas: Aster mo konpran kifer Soodhun kapav pas lor latet Xavier, Ivan, ek mem Vishnu. Me selman to bizin admet ki Soodhun enn ustad dan fer lanons frakasan.

Bulbak: Si to satisfete ek bann bel bel lanons, lerla mo dakor ki Soodhun enn minis ustad.

Nuvo Danze Fasism ek plis Koripsyon

Lalwa Bhadain, enn seri 3 lalwa, avek enn ladan enn amandman Konstitisyon, pu anfet fer Guvernman vinn pli otoriter ankor. Malerezman, mem avek amandman, sa seri Lalwa Bhadain finn pase avek mazoorite trwa-kar.

Arselman adverser politik

Sa bann lalwa Bhadain la, zot pu permet Lexekitif arsel nerport ki adverser partizann. Zot pu fer sa atraver konvok adverser la pu li “zistifye so dibyin”, e sa li kapav fer nerport kan. Avek letan, ofisye ek Minis pu mem riske servi sa puvwar extraordinar la pu extork brayb depi dimunn ris. Alor, li pu ogmant mal-praktis ek koripsyon, pa diminye zot.

Kreasyon enn Fon Anti-Demokratik

Lalwa Bhadain pu permet Guvernman met so lame lor enn espes “fon” ki pu tom konpletman andeor Fon Konsolide Guvernman (*Consolidated Fund*). Sa vedir Minister Bhadain pu ena so prop “bidze” ki napa traverse dan Bidze Guvernman atraver Parlman, kot ena enn kontrol direk. Reset sa nuvo fon la, li sorti dan larzan ki li *konfiske* kumsa-mem. Pa zis sa. Me, Minis Bhadain ek so bann nomini, zot pu depans sa kas la, ant-ot, pu donn espes “prim” pu bann informater, enn kote, e pu akord bann “pri” a bann kapitalist ki fer “bon biznesmenn”. Sa osi, sanki Parlman ena enn drwa refiz vot sa larzan la dan Bidze anyel. Li kuma enn ansyin reyn feodal.

Degradasyon rol Ziz Lakur Siprem.

Sa lalwa la fer Ziz met istamp lor enn desizyon enn espes komite ki tom su kontrol Minis Bhadain. Sa arive atraver kreasyon enn konfizyon total *par expre* ant

lalwa o-osivil ek lalwa-o-kriminel. Anmemtan, Ziz sipoze pran enn kalite aksyon ki pa veritableman “*travay zidisyer*”, an okirans Ziz la pe ras dibyin ar kikenn *pa* akoz li finn truv li kupab enn deli, me akoz li pa pe kapav explik provenans so dibyin ar enn Bord Bhadain.



Desin Magritte

Ras puvwar depi Direkter Purswit Piblik:

Bann lalwa tir puvwar konfiske dibyin depi DPP, “enn kreatir konstitisyonel”, met li dan lame enn but dan Lexekitif ki pena sa mem proteksyon konstitisyonel, setadir dan lame Minis *Good Governance* e so bann nomini. Li uver laport a tu kalite abi puvwarist ek partizann. Dayer, li pa enn sekre ki Guvernman finn deklar lager partizann kont DPP aktyel, Satyajit Boolell. Alor, lalwa la li enn aksyon partizann, e li anmemtan, a son tur, prepar sime pu ankor plis aksyon partizann dan lavenir.

Bann Minis inn fer nerport kwa pu fer sa bann Bil la pase. Kan kikenn ti pe kritik sa bann Bil la, Minis Bhadain, Collendavelloo ek Premye Minis tutswit ti pe dir – sirman akoz zot mank argiman – , “*Si u koz kont sa bann lalwa la, sa vedir u kupab!*” ubyin “*Parti Travayis pu kone ar sa lalwa la!*” Alor, zot pe furni prev, par zot prop parol, ki bi sa bann lalwa la se pu vinn arsel zot adverser politik, avek “lavantaz” ki li deza konsidere kuma “kupab”; e akize la bizin pruv so linosans, sann kut la.

Li plito vre pu dir ki buku dimunn ki finn koz anfaver sa bann lalwa la, zot swa pa

finn reflesi ase lor konsekans lor sosyete Moris, ubyin zot finn sibir presyon deza depi Guvernman.

Ena dan Lalyans Lepep ki tuzur paret kont

Dayer, Bil ki ti introdur klerman ti bakle, akoz Guvernman finn oblize amenn enn vole kut amandman. Deza PMSD ti met 2 manb jukal pran laparol dan deba Parlman. So bann Minis prefer res frankil, vote su presyon. Alor, zot inpe kont, me zot vot pur. Li enn pozisyon politik ridikil.

Pozisyon MMM

MMM, li osi, ridikil. Li finn vot anfaver amandman konstitisyonel ki permet lalwa GGIR existe, me sanki li vot GGIR. Sa osi, li fer li pas pu ridikil.

Pozisyon bann Sindikalo-politik

Ashok Subron ek so RA, zot kareman an-faver, e finn fer apel a tu depite pu vot anfaver. Zot sel kritik, se lalwa ti bizin elarzi pu kuver etranze osi! Zot ti anfaver mem avan bann amandman.

Jack Bizlall ek so MPM, li dir, si amand Konstitisyon, bizin fer enn 2yem Repiblik, ubyin pa tus Konstitisyon. (Li ti deza uver laport pu Ramgoolam-Bérenger zot 2yem Repiblik, dan mem fason!) Li pa kont sa 2 lalwa la, li dir.

Si Guvernman, ubyin sa bann parti lopolisyon la, krwar ki sosyete Moris pu fini ar koripsyon ek rulman ilegal atraver enn sinp lalwa ki permet Minis Bhadain & Co. konfiske dibyin dan enn fason diktater, zot pe vreman reve. Sa seri lalwa la pu klerman riske ogmant koripsyon – sirtu onivo Minister *Good Governance*, limem – osi byin ki amenn plis diktatir alinteryer sistem kapitalist.

E si ena dimunn krwar u

kapav afebli “propriete prive” zis atraver ogmant puvwar otokratik Lexekitif, sa osi, li enn rev. Li enn rev parkilyerman danzere, ki riske turn an kosmar. Fode nu rapel ki Guvernman Nazi su Adolf Hitler dan Lalmayn, li ti konfiske dibyin bonaveni, atraver enn seri lalwa ki ti permet li, anmemtan ki gard sistem kapitalist anplas. Anfet, samem ki apel fasism. Dan ka Guvernman Jugnauth, kuma tuzur, li enn Guvernman “Bonapartist” ubyin “Peronist”, setadir enn form fasism ki instor enn “leta dominier”, pa telman lor baz enn mobilizasyon popiler, me lor baz enn ideoloji pu dominn tu klas sosyal, mem burzwazi, me san okenn proze politik pu kree enn lot kalite sosyete.

Bhadain inn ankoler ki dimunn ti pe apel sa “Lalwa *Bhadain*”, me li exak. Lalwa Bhadain donn li tu kalite puvwar diktater. E dayer, dan so prop parti, zot pa paret finn tom dakor avan prezant li. Danielle Selvon ti mem demisyone, avan sertin amandman. Lezot depite MSM ti kont premye versyon Bil. Lagazet dir Nando Bodha ti ankoler dan Kabine Minis. PMSD ek ML pa ti tro tro dakor nonpli, mem zot finn vote. Alor, li pa ti “Lalwa Kabine” ki ti prezante pu First Reading, me Lalwa Bhadain. E, parey kuma lalwa IRA ek lalwa POA, zot finn pase avek byin tigit mirmire. Malerezman.

Bhadain kapav uver lanket limem

Bhadain ek so bann nomini (*Integrity Reporting Services Agency*) pu kapav uver lanket, al get enn ziz pu li siyne, lerla konfiske dibyin enn kikenn.

Anplis, Bhadain ek so bann zom pu ansarz donn enn lamone, enn prim, nerport ki informater ki raport dimunn ar Leta. Alor, sa pu vinn enn fason fer larzan. Sa larzan ki kikenn pa kapav explike la, ki pu zis konfiske la, li ondire enn tax 100%.

Degrad sosyete Moris

Si Guvernman kumans rekom-pans “mus” kumsa, kumans arsel so adverser ar lanket, kumans konfiske dibyin ki kikenn pa kapav explike, sa pu sanz natir sosyete Moris.

Rivalite ant Kapitalist riske provok makrotaz

Sanzman pu orib. Avek sa bann “prim”, avek sanzman *onus of proof* (akoz sa konfiskasyon la li andeor sistem o-kriminel), byin vit enn kapitalist, kan li truv enn konpetiter pe monte, pu servi Bhadain ek so bann zom pu arsel zot adverser, sirtu si li enn *nouveau riche*. Sa taktik la pu lev latet zis dan moman kot pe sumet tennder.

Lager Klan ek Fami

Natirelman, dan enn sosyete kuma Moris kot ena enn ta gran-gran lager familyal, kot enn brans enn fami deteste enn lot, kot enn vwazin inn gayn bel bagar ar lot, kot zom dan enn fami pa kontan enn bug ki pe frekant zot tifi/ser, pu ena tu kalite denonsyasyon ek arselman konpletman meskin. Lefe lor bann fami ki viktim pu devastater. Natirelman, zot ena buku sans ki zot pu kapav “explike” dan 21 zur, me zot pu fini tromatize; zot repitasyon pu fini rwine. Tro tar.

“Onus of Proof”

Zis pu tu dimunn kone, ala ki lalwa dir lor kimanyer u asime kupab: “*Any application made under this Act shall constitute civil proceedings and the onus shall lie on the respondent to establish, on a balance of probabilities, that any property is not unexplained wealth.*” Sa vedir, nerport ki aplikasyon su sa lalwa la, li form parti prosedir o-sivil e devwar explike ki nerport ki dibyin li pa *dibyin ki pa-explike*, li pu deside lor baz balans 50-50, e se devwar seki akize pu prove provenans sa dibyin la. Kuma tu dimunn kone kestyon li pa telman lor la, me lor arselman sa prosedir la.

Minis ubyin so Nomini vinn kuma “Papa Doc”

Enn laspe pli absird sa lalwa la, se sa “Fon Bhadain” ki andeor Bidze anyel la, li kapav servi pu “diminye lapovrete”. Wi, lalwa la dir sa. Alor, enn Minis ek so bann nomini, finn eriz zot-mem an swadizan filantrop, me filantrop konpletman andeor kontrol sosyal. Sa kalite puvwar diskresyoner la, li uver laport a tu kalite koripsyon konpletman debride. Enn dimunn avek buku puvwar ek larzan ki zet li lor “bann pov”, li inpe kuma Papa Doc dan Haiti kan li ti pe avoy bonbon ar zanf an afame depi so limozinn. Sa kalite puvwar la, li amenn inpinite.

Motivasyon Guvernman?

Depi kumansman, dan LALIT nu pe met lanfaz lor labsans enn veritab zistifikasyon pu “Lalwa Bhadain” la. Pena okenn ni lozik, ni explikasyon kifer pe instor enn tel seri mezir otokrat. E kuma Sheila Bunwaree finn atir latansyon, sa bann lalwa la pa finn mansyone ni dan Diskur Prezidan, ni dan Jugnauth so gran vizyon 2030. Vit-vit, pu kit rezon, Guvernman Lepep finn mazinn zot, amenn zot, amand zot, vot zot.

Me, kifer?

Nu pa kone.

Nupanseli posibki Guvernman pe kuver so azisman kan li finn anfet konfiske dibyin Dawood Rawat, sanki li finn truve kupab kit deli. Me, Guvernman pu kit rezon pa ule dir ki sa so rezon. Setadir Guvernman ena lafreyer li perdi purswit Rawat kont Leta pu Rs40 milyar, e li ena lafreyer pu admet sa, osi.

Nu panse ki li petet osi posib ki Bhadain, dan li pe rod atir investiser dan so bann vwayaz partu-partu, pe tap ar enn problem otur enn “move repitasyon” Moris, an okirans ena sertin Morisyin dan biznes ki rant dan Joint Venture ar etranze investiser, eskrok zot, gard larzan. Sa arive sirtu pandan ki investiser potansyel,

li dan prozesis etabli so biznes isi. Suvan investiser, avan li gayn “rezidans”, li bizin enn espes “pret-nom” ubyin enn “partner” pu li reysi rantre. Li ena enn problem “pul ek dizef”. Pu li gayn rezidans, li bizin investi, e pu li aste lakaz, par exanp, li bizin rezidan. Alor, ena enn sertin laps letan kan li

pankor ena okenn drwa. Ena buku gran, gran eskrokri ki finn fer, e nu kone Moris ena sa move repitasyon la. Eski pu sey bar sa, ki zot finn amenn sa lalwa drakonyin la?

Me, sa osi, Guvernman pa ule dir ki li aköz sa.

Alor, nu bizin zis asime, ki li selman enn lalwa diktater.

Enn lalwa ki permet arselman kontinyel kont adverser politik. Akumanse, sirman, par servi li kont Parti Travayist.

Pena lavenir dan sa kalite politik la.

LCC

LALIT AN AKSYON

BILAN LALIT 2015

Avan nu vinn lor bilan, dan ki kontex LALIT finn amenn so bann aksyon an 2015.

Kontex politik

2015 finn enn lane ki finn marke par instalasyon enn nuvo Guvernman opuvwar. Dan lespas enn an nuvo Guvernman pe travers par enn peryod instabilite asterla, apre zot vag “operasyon netwayaz” ki zot finn deklanse ek apre demantelman konglomera BAI.

Kote Lopoziyon, apre zot defet dan eleksyon zeneral Desam 2014 ek eleksyon minisipal an Zin sa lane la, zot finn fragmante e afebli.

Fas a sa Guvernman ki pa stab ek fas a enn Lopoziyon feb, parti LALIT sel lafors politik ki finn azir lor plizyer fron pu fer travay enn veritab lafors lopoziyon.

LALIT finn pandan lane reprezant enn lopoziyon kredib ek konsistan e finn kontiyn azir atraver aksyon ek refleksyon lor baz nu program.

Kanpayn kont ID Kard Biometrik

Kan LALIT ti pran desizyon pu konteste ID Kard biometrik, nu ti kone ki li enn lalit byin difisil pu gayne. Me, nu ti truve ki li inportan anklans batay, parski prozesis amenn sa lalit la, li devlop konsyans politik enn lamas dimunn ki pa ditu realiz danze sa kalite sirveyans represiv la. Nu finn konstate avek satisfaksyon, ki anfet nu

finn reysi ranport enn viktwar, mem si, kuma u pu truve, li pa total.



Extre desin Picasso

Pandan 2015, LALIT finn kontiyn, avek konstans, fer presyon pu eliminasyon Kard Idandite Biometrik ek destriksyon stokaz databeyz santralize. Plizyer fwa LALIT finn oblize met sa nuvo Guvernman la divan so reponsabilite. An Desam 2014, LALIT finn pran linyativ, ansam avek set lezot lorganizasyon, atraver enn petition, pu rapel nuvo Guvernman ki so program elektoral dir li pu demantel Kart Idandite Biometrik. Me Guvernman finn kasyet deryer lefet ki bizin atann Zizman dan keys lakur. Sa paret plito enn fason evit pran aksyon politik kuraze.

Kan Zizman anfaver destriksyon databeyz biometrik santralize finalman tonbe an mwa Me 2015, Lotorite finn, kumsiryin ete, kontiyn oper bann Sant Konversyon, pran lanprint dimunn, e li ti kumans fer dimunn siyn enn espes *consent form* pu sey kuver Leta legalman, aköz li pe al an-kont Zizman.

LALIT ti alarme.

Alor, le 19 Ut, LALIT finn organiz enn lamars dan Port-Louis pu met enn konplint ar *Data Protection Commissioner* (DPC), Ms Madhub. Nu delegasyon finn zwenn li, e finn formelman dimann li pran aksyon. Mem zur, mem ler, ki LALIT pe fer sa aksyon, nu anprann, avek etonnman, ki Guvernman finn pran desizyon pu kareman ferm tu so Sant Konversyon 24 Ut a 11 Septam pu ki Leta kapav detrir tu lanprint. Anfet, li pa mem respekste seki li finn anonse dan Kabine Minis 5 Zin: *The ID Card system is being reviewed to remove the biometrik data, including photograph, fingerprint image and fingerprint minutiae.*

Zis lerla ki Guvernman finn finalman detrir databeyz santralize. Alor, sa li enn sertin viktwar.

Me, selman, stokaz databeyz santralize done biometrik pe anfet kontiyne an-parti, malgre Zizman e malgre lanons Kabine Minis le 5 Zin. An partikilye, pe kontiyn gard foto biometrik dan sa databeyz la, an-permanans. E, li pe tir nuvo foto biometrik. E li pe osi gard lanprint dan databeyz pandan enn tan, kan li pe met li lor kart.

Swit a let LALIT, DPC finn anfet intervenir pu dimann explikasyon Minis Badhain, ki ziska ler pa finn reponn, otan ki nu kone.

Asterla, ena Lapel Dr Madhewoo divan Privy Council, alor

Guvernman finn oblize ranvway dele pu nuvo kart pu Lafin Zanvye 2016, e pu sirman bizin re-etann so dedlayn ankor.

Li enn siyn enn Guvernman an debandad.

Sitiyasyon res flu lor kestyon foto biometrik pu tu dimunn, ek stokaz lanprint pu dimunn ki pe tir nuvo Kart.

Lor kestyon amandman lalwa represif ki inpoz gro lamann ek santans prizon pu dimunn ki pena nuvo kart ID, la usi Guvernman pli an-debandad. Li res tchom-tayt.

LALIT sel lafors politik ki finn, lor letan, amenn kanpayn kont Kart ID biometrik, enn konba politik ki finn fer atraver lafis, trak, manif, youtube, travay ankomin avek lezot lorganizasyon, let uver a Minis ek lezot form aksyon. Finn ena bann gin dan sa lalit la, me mobilizasyon bizin kontinye kont Kart Idantite Biometrik pu 2016. (Get bwat lor sa Zizman la, plitar dan Revi.)

Kanpayn pu rekonesans langaz Kreol

LALIT finn kontiyn kanpayn pu langaz Kreol servi kuma enn lang ofisyel dan Parlman, dan sistem ledikasyon ek osi pu drwa lorganizasyon pu gard minits dan sa lang la.

Apré eleksyon *Guvernman Lepep* Desam 2014, LALIT finn tutswit pran aksyon, adres enn let a Speaker ek Premye Minis lor neseseite introdwir langaz Kreol dan Parlman.

LALIT finn relans sa kanpayn anfavér langaz Kreol kan lalwa pu retransmisyon deba parlamanter andirek lor MBC vinn lor latab. Nu finn organiz enn kanpayn lafis atraver Moris avek slogan 'Langaz Lepep bizin rant dan Parlman'. Nu finn anmemtan adres enn dezyem let a Premye Minis, plis sann fwa la, nu finn avoy let la a tu parlamanter. Ladan nu finn met lanfaz lor neseseite amand Konstitisyon pu introdwir langaz Kreol dan Parlman, etan

done pe retransmet li an direk. Nu kanpayn finn obliz sertain parlamanter pran pozisyon an-faver pu premye fwa.

Sa kanpayn la finn ena osi enn lefe dan medya kot finn ena blog interesan anfavér langaz Kreol dan Parlman.

Nu finn osi pran pozisyon lor neseseite introdwir langaz Kreol kuma medyom dan kontex deba lor *9-year schooling*.

Kanpayn LALIT lor letan, ansam avek travay lezot lorganizasyon kuma *Ledikasyon pu Travayer*, Playgroup, ABAIM ek bann lezot individi, finn kontribiye pu sanz rapor defors anfavér langaz Kreol. Asterla, nu bizin viz laviktwar.

Re-inifikasyon Repiblik, drwa retur Chagosyen, fermtir baz Diego

An Desam 2014, LALIT finn adres enn let a Minis Zafer Etranzer, Etienne Sinatambou pu dimann ki nuvo Guvernman kumans antam demars pu met ka divan ICJ kont demantelman Larsipel Chagos avan Lindepandans. Malgre ki sa demand la ti dan zot program elektoral, Guvernman Lepep finn ramoli so pozisyon apre. Anfet dan diskur program an Zanvye 2015, Guvernman anons ki pe rod bann solisyon *diplomatik* pu return Chagos a Moris e pa masyonn ka ICJ ditu.

Zizman UNCLOS an Mars 2015, finn vinn kondann Guvernman UK pu so proze *Marine Protected Area*. Apré sa zizman la, LALIT finn re-fer enn lapel a Guvernman Moris pu al ver enn rezolisyon UN, pu amenn ka divan ICJ. LALIT finn re-adres enn let a Premye Minis, kopi a Prezidan, Minis Zafer Etranzer, Lider Lopoziyon kot nu fer enn lapel pu enn vizit deta, dan kad build-up pu enn ka divan ICJ.

Me, Premye Minis so diskur divan Nasyon Zini finn evit koz ka divan ICJ, li finn plito ofer pu negosye renuelman bay avek Leta Zini e anmemtan atak UK. Lopoziyon MMM usi finn aliyn

li lor sa pozisyon Guvernman la.

LALIT sel lafors politik ki finn konsistan lor nu pozisyon pu opoz prezans baz militer US lor Chagos etan done ki prezans baz reprezant enn blokaz pu demand otur suvrennte ek drwa de retur.

LALIT avek MLF finn osi averti *Grup Refizye Chagos* (GRC) lor muv Guvernman Britanik pu diviz e afebli lalit kont okipasyon ilegal Chagos. Anfet, Leta Britanik finn sirkil enn kestyoner a tu Chagosien pu swadizan get zot lopinyon lor plan reseteylment. Sa kestyoner la li plito kuma enn referendundum degize, enn pyez, avek kondisyon atase pu reseteylment. Nu finn fer sa lapel a GRC atraver Olivier Bancoult pu rezet enn tel kestyoner.

Anfet, Guvernman Moris finn imilye net. Leta Britanik pa sipoze fer enn tel kestyoner par li, dapre Zizman UNCLOS. Me, telman Jugnauth ti sede, Britanik inn truve ki later mu.

Nu finn osi met GRC divan zot responsabilite dan enn dezyem let le 29 Oktob, sirtu lor zot pozisyon konsernan prezans baz militer US lor Diego Garcia

Pu enn Lekonomi Alternativ

LALIT finn kontiyn kanpayn *Pu Enn Lekonomi Alternativ*, sirtu dan kontex kriz dan Lindistri Sikriyer ek lezot sektor ekonomik dan Moris.

An Fevriye 2015, dan kontex premye bidze Guvernman Lepep, LALIT finn sumet nu bann propozisyon ar Minis Finans, Vishnu Lutchmeenaraidoo ek Minis Agro Lindistri, Mahen Seeruttun. Nu propozisyon konsern devlopman ek ranforsisman sektor agrikol, pu devlopman lindistri transformasyon ek konservasyon. Nu osi truv neseseite pu devlop sektor lapes. Ansam avek nu propozisyon nu finn depoz nu progam *Pu enn Lekonomi Alternativ*, Sart lor Sekirite Alimanter ek ti-fim LALIT lor lavenir disik ek agrikiltir.

An Avril, LALIT finn organiz

enn sesyon intern pu manb ek sinpatizan lor diversifikasyon agrikol ek lindistri prezerv manze pu get andetay diferan laspe nu kanpayn ek lanpler bann dega ki deza pe fer avek politik guvernman pu detrir later agrikol. Nu finn kumans realiz danze imans sa stratezi *Smart Cities* la.

Anmemtan LALIT finn kontiyn organiz renyon desantralize baze lor nu program kot nu finn gayn lapor bann kamarad Rodrig dan deba.


An Ut sa lane, dan enn sesyon Refleksyon ek Deba, kamarad Ram Seegobin finn koz lor neseseite rekonsevwar enn *nuvo zeografi ekonomik* pu Moris. Lavil ek lakanpayn finn sanbarde, preske defigure dan dernye 15-20 an. Li ti enn kozri inportan pu nu konpran sanzman drastik dan peizaz ekonomik anterm zeografik ek so lefe lor sosyete. Finn ena deba interesan ki finn swiv apre.

Onivo LALIT nu pu kontiyn travay mobilizasyon otur *Program pu enn Lekonomi Alternativ*, sirtu dan kontex kot Guvernman pe plito anons proze eriz *Smart Cities* partu ki pu dilapid par milye arpan later agrikol, e pu bayant later Moris. Guvernman pe fer lekotrer enn reform agrer. Li pe permet enn nuvo kolonizasyon. Tusala, nu dan LALIT finn kumans realize an 2015.

Kont okipasyon Palestinn

LALIT finn tultan met kestyon drwa Palestinyin ek lalit kont okipasyon ilegal Israel lor azanda. Sa travay la baze lor plizyer lane langazman ki finn pran lanpler avek vizit solidarite Alain Ah-Vee ek Kisna Kistnasamy dan Palestinn

Sa lane, Palestinn finn vinn osant aktyalite apre vizit Minis Turism, Xavier Duval dan Bethlehem dan Palestinn. Anmemtan, kriz otur Mwayin Oryan ek lamonte ISIS, finn osi met Palestinn o-sant bann preokipasyon.



Desin Raoul Dufy, Lor Pon Queen Mary

Dan mwa Oktob, LALIT ansam Sant Idriss Goomany ek CTSP finn organiz enn zurne solidarite avek Lepep Palestinn atraver prozeksyon 3 fim dokimanter ki swiv avek deba. Lansman sa zurne la ti fer par ansyin-Prezidan Cassam Uteem, GNRW kot LALIT. Sa zurne solidarite ti enn veritab sikse.

LALIT truve li nesese batir enn solidarite avek lepep Palestinyin lor baz enn kanpayn boykot ekonomik ek politik leta Israel. LALIT finn adres enn let a Premye Minis an Novam pu reklam ki Leta Moris pran linsiyativ pu ralye sipor depi SADC, Linyon Afrikin, COI ek Muvman Non-Aliyne lor trwa demand;

1. Zel relasyon diplomatik avek Leta Israel ziska lafin lokipasyon e aret politik kolonizasyon Palestinn osi byin ki uver enn lanbasad dan Palestinn.

2. Sutenir enn embargo ki pu blok furnitir zarm depi Lerop ek Leta Zini, zarm ki responsab pu okipasyon ek krim Leta Israel kont Lepep Palestinyin.

3. Sispanyon tu lyin komersyal avek Israel dan kontex enn kanpayn Internasyonal *Boycott, Disinvestment and Sanctions* (BDS) onivo internasyonal. Sa let LALIT finn enndors par CTSP, Sant Idriss Goomany, MLF ek ansyin-Prezidan Cassam Uteem.

Lozman

LALIT ek Muvman Lakaz finn expoz lanter diferan Guvernman

lor zot plan konstrikasyon lozman ek finn expoz osi propagann lor lefet ki mazorite dimunn propriyeter zot lozman. Nu finn osi opoz tu represyon kont dimunn ki dan problem lozman ki pe viv lor stateland. Sa travay ki nu finn fer lor letan pe fer lotorite realiz lanpler kriz lozman, me nu bizin kontiyn mobilizasyon kont dilapidasyon later pu proze *Smart Cities* avek apartman delix pu dimunn ris ek diaspora.

Lor kestyon Ladrog

Kestyon Ladrog finn refer sirfas avek desizyon Guvernman pu met enn Komsisyon Danket lor trafik ladrog. LALIT finn publiye enn liv ki enn konpilasyon tu bann papye ek diskur nu finn fer lor letan lor kestyon ladrog avek nu bann propozisyon pu dekriminaliz utilizater ladrog.

Sa program lor ladrog finn distribye dan enn fason militan avek enn seri lorganizasyon ki zot travay santre lor problem ladrog. Nu finn bizin riprintt program swit a demand depi plizyer lorganizasyon ki pe rod plis kopi pu zot bann manb. Nu finn osi ofisyelman remet Prezidan Repiblik ek DPP enn kopi program apre ki zot finn pran pozisyon dan enn fason ki met ladrog dir ek ladrog ki pa fer ditor dan mem panye.

Vyolans Polisyer

AtraverlorganizasyonJUSTICE, LALIT finn alavangard lalit kont tortir ek britalite polisyer.

Apres lamor trazit Iqbal Toofany kumansman sa lane, dan drol sirkonstans dan stasyon Riviere Nwar, LALIT finn divan-divan pu esprim solidarite ar lafamiy Iqbal Toofany e osi pu opoz tu muv pu kominaliz sa lamor dan selil. Leta finn azir vit, finn ena arestasyon ek sipansyon 5 ofisyè lapolis me ziska ler pankor ena kondanasyon.

LALIT pe kontiyn kanpayn kont vyolans Leta e kont kiltir inpinite ofisyè Leta pu krim ek tortir zot pe komet.

Kont sosyete Patriarkal

Bann manb fam LALIT finn atraver Komisyon Fam ek antan ki manb MLF kontinyelman opoz sa stratezi 'Gender equality' ki gard e ranforsi sistem Patriarsi. Bann militan LALIT finn dedye buku letan atraver media pu expoz natir Patriarsi, e so rol dan opresyon ek dominasyon fam.

Sesyon lor bann tem spesifik

Pandan lane, LALIT finn organiz diferan sesyon uver ansam avek deba lor tu kalite size ki tus sosyete. Sesyon finn anime par manb LALIT osi byin ki bann invite;

- Ram Seegobin: "Nuvo zeografi ekonomik".
- Lindsey Collen ek Shabeela Kalla: "Leta dan Letan".
- Ish Sookun (invite) lor Linux.
- Rada Kistnasamy: "Rekonpozisyon burzwazi ek so lorganizasyon kuma MSPA, MEF, JEC."
- Kisna Kistnasamy: "Robotizasyon, Kompyuterizasyon, lefe lor valer".
- Alain Ah Vee: "Elektoralism".

Nu finn ena osi sesyon refleksyon ant manb ek sinpatizan lor

- Ofshor, inkli *Double Taxation Avoidance Agreement*.
- Ekoloji de pwinvi Marxist, ek emezans bann fos "ekolozis" finansè par patron.
- Lyin LALIT avek lezot lorganizasyon dan lepok aktyel.
- Stratezi pu kontinyasyon kanpayn kont Kart ID Biometrik.

Nu finn demar rekleksyon lor rol

bann ONG ki azir kuma frin pu lalit pu sosyalism. Nu pe deza konseptyaliz enn sinpozyam lor sa size la pu 2016.

Mwayin

Premye mwayin LALIT, se nu bann "striktir" ki permet nu fonksyone, e permet nu liye nu ar piblik. Nu brans, komisyon, reynion regilye otur "program LALIT", komite redaksyon pu Revi, tu sa permet parti la respire e devlope. E ena Lasanble Manb, ki elir Komite Santral, ki zwenn regilyerman. Sa lane la, enn travay adisyonel ki nu pe fer dan bann striktir, se preparasyon enn "Ti-Liv LALIT" pu nuvo sinpatizan.

Pandan 2015 LALIT so Komisyon Web finn moderniz prezantasyon nu Websayt, e fer li buku pli user-friendly. Nu finn osi azut linnk avek Youtube, Sound Cloud. Sa mars ansam avek nuvo mwayin pu anrezistre kozri pu poste lor websayt, osi byin ki met lor DVD pu partaze ant manb ek sinpatizan.

Revi LALIT li zuti inportan pu devlop koerans ant manb ek sinpatizan lor stratezi LALIT osi byin ki enn zuti ki devlop lyin avek klas travayer organize ek dimunn pli avanse dan sosyete. E li nu zuti rekritman ideal, parski dimunn devlop enn konesans lor politik LALIT, alor si zot dakor, zot zwenn lor

sa baz la. Komite Redaksyon ki gid prodiksyon Revi. Revi 121 reprezant 5yem nimero pu 2015. Ena enn distribisyon militan dan diferan landrwa dan Moris, Rodrig osi byin ki La Reunion. Revi osi pibliye lor nu websayt 2-3 semenn apre ki li finn sorti.

Nu finn ena osi distribisyon trak lor lagar bis, antu trwa diferan distribisyon sa lane.


Lot mwayin LALIT itilize se servi emeyl pu sirkil dokiman lor nu pozisyon.

LALIT dan Media

Pandan 2015, LALIT finn ena enn prezans konstan dan radyo ek lapres ekri, ki li atraver kominike, intervyu ek deklarasyon diferan manb LALIT. Me, finn ena osi konfli dan relasyon LALIT ek medya, sirtu otur skandal BAI. Swit-a enn lartik analiz ki ti paret dan Revi LALIT 118, Direkter Defimedia Grup, Eshan Khodabux finn anons ki li pe purswiv *Le Mauricien* ki ti fer referans a sa lartik la ek kamarad Lindsey Collen ki finn siyn lartik pu revu LALIT.

Onivo LALIT, nu krwar dan nesosite pu kontiyn devlop tu nu bann mwayen kominike pu ki nu pa depann inikman lor Lapres komersyal pu fer dimunn konn nu aksyon ek refleksyon.

RK



Desin Raoul Dufy, Orchestre

Kanpayn anfaver langaz Kreol dan Parlman

Avek akselerasyon kanpayn LALIT pu langaz Kreol rant dan Parlman, balans de fors finn sanze enn sel ku.

Tu dimunn pe dir zot anfaver.

Ena zis Premye Minis Jugnauth ki ti deza amenn enn mosyon anfaver, ki asterla mank kuraz.

Plis Minis Bhadain, reaksyoner lor tu pwin, ki finn pran pozisyon kont.

Lider Lopoziyon Bérenger, tuzur kapon, dir li “inevitab”.

Ondire li pu arive par mazik!

Li inportan ki kontiyn met presyon pu ki gayn laviktwar lor la.

An Oktob guvernman *Lalyans Lepep* ti fer enn sesyon spesyal Lasanble Nasyonal pu diskite retransmisyon andirek deba parlamanter lor MBCTV apartir 2016. Li tutafe lozik ki lepep bizin kone seki pe diskite dan Parlman me fode ki depite, minis koz dan enn langaz ki dimunn Moris konpran byin. Sel langaz ki reponn a sa kriter la se langaz Kreol.

Linisyativ LALIT

LALIT finn tultan milite anfaver ki lang Kreol servi dan tu linstitisyon Leta .

Dan kontex sa deba lor introdiksyon Kreol dan Parlman, LALIT finn ekir Premye Minis enn let date le 20 Oktob pu dimann ki so Guvernman vinn delavan avek enn proze delwa pu amand Seksyon 49 Konstitisyon pu ki langaz Angle ek osi Kreol vinn lang ofisyel Parlman e kapav koz an Franse osi. Kopi sa let la ti osi adrese a Spiker, Minis Lazistis, Lider Lopoziyon, ek tu depite.

De zur apre, LALIT finn fer enn lapel piblik atraver lapres a tu depite pu ki zot pran laparol an Kreol sa zur kot ena sa seans spesyal la. Ni Premye Minis, ni okenn Minis ni depite pa finn risponns a linisyativ LALIT. Pandan mem mwa LALIT finn lans enn kanpayn lafis avek slogan “*Langaz Lepep bizin rant dan Parlman*”. Dan tu vilaz , tu lavil kot militan Lalit finn kol sa lafis la dimunn finn dir zot ful dakor ar sa demand la. Anfet kanpayn lafis Lalit fin deklans deba dan lapres ek radyo e preske tu dimunn pe truve ki ler

finn vini pu ki Lang Kreol pran so plas dan Parlman. Dan *5-Plus* 25 Oktob 2015, tu dimunn dan enn mikro-trotwar finn koz anfaver ki deba parlamanter fer an Kreol. Telman balans defors anfaver langaz Kreol inn sanze, ki enn editoryalist, Rabin Bhujun, finn ekir so editoryal dan IONNEWS an Kreol e anfaver introdiksyon lang Kreol dan Parlman.



Desin Marc Chagall, *Over the Town*

Ki pozisyon dan Lalyans Lepep ek MMM

Lepep paret an avans lor so bann eli lor plas ki langaz Kreol bizin okipe dan Parlman.

Anfet zordi pena okenn pretext pu pa introdire lang Kreol kuma langaz deba dan Parlman. Lang Kreol pe servi dan lekol kuma lang opsyonel depi 2012 e zordi li ena zuti nesesser pu asim sa rol la. Li ena so diksyoner, so liv gramer, liv zistwar, so kerikulum, so papye lexame, kur formasyon profeser. Par kont seki pena pu lemoman se volonte ek kuraz politik depi MSM-PMSD-ML ek parti lopoziyon dan Parlman.

Li vre ki Minis Aurore Perraud ek Xavier Duval, depite Malini Seewocksing, Mahen Jhugroo finn dir zot anfaver . Li paret pena lakorite dan Lalyans Lepep lor sa size la parski Aneerood Jugnauth ek Rosh Bhadain finn dir zot pa dakor. Purtan samem Aneerood Jugnauth kan li ti lider lopoziyon an 1977 ti prezant

enn mosyon prive pu ki amand Konstitisyon pu ki kapav servi lang Kreol pu deba dan Parlman (get lartik paz 13).

Lider lopoziyon aktyel sokote finn dir ki avek retransmisyon andirek deba parlamanter li pu otomatik ki lang Kreol rant dan Parlman. Kumadir li pu arive par mazik. Li pu arive selman si ena enn mosyon formel pu ki introdire lang Kreol dan Parlman. Li pa otomatik.

Seki anfet otomatik se lefet ki tu depite, minis dimoman zot met lipye dan Parlman zot tu kurbe, zot aret koz Kreol ek swazir pu exprim zot an Angle ubyin Franse. Zis akoz dan enn ti paragraf seksyon 49 Konstitisyon li ekir bizin servi Angle ubyin Franse. Kifer sa bann mem dimunn la vinn koz ar lepep dan miting, dan renyon noktirn, lor radyo-TV dan lang Kreol ek lerla kan zot eli zot aret servi samem lang la pu debat dan Parlman? Arnaud Carpooran finn apel sa enn trahizon pakt demokratik ki zot finn fer ar lepep. Eski bann depite truv li normal ki an 2016 kan deba pu andirek lor TV, dimunn ki finn elir zot ekut zot koze dan 2 langaz etranzer ki gran mazorite dimunn Moris, inkli zot usi, pa servi tulezur lakaz? Ki zot pe atann pu met fin a sa absirdite kot langaz lepep exklir depi Parlman kot reprezantan lepep zwenn?

Inn ler pu ki langaz lepep nepli res andeor Lasanble Nasyonal Repiblik Moris, kuma li finn reste depi lepok kolonyal.

AA

LET UVER LALIT A PREMYE MINIS LANGAZ KREOL DAN PARLMAN

Dear Sir,

You will recall that we wrote to you, as Leader of the House, and to the Speaker in December, 2014 after the election of your electoral alliance to the National Assembly with a 3/4 majority. We wrote to call on you to bring in a simple constitutional amendment to allow the language of the people, Mauritian Kreol, to become joint (with English) medium in the National Assembly. In that letter we referred to the fact that you already intended for live MBC TV broadcasting of Parliament, which makes the introduction of the language people understand more pressing.

This Friday, on your initiative, the National Assembly will be discussing the Select Committee's advice to discuss and implement such live broadcast.

Given that:

- Kreol is the main language of "lepep",
- 67% of the people are in favour of using Mauritian Kreol in the National Assembly, only 18% are strongly against, and 9% somewhat against. This was despite the survey also showing, in another question, that only 20% of people knew there were Kreol dictionaries and courses in existence! (SOFRES, 2009)
- Kreol is now taught as a subject in its own right, in schools, and has been for four cohorts, which means literally tens of thousands of families are familiar with it in written form.
- Court Transcribers have followed a course in written Kreol, organized by the *Institute for Judicial and Legal Studies*,
- * The MIE has a Kreol Unit headed by Dr. Nita Ragoonundhun, preparing text books in Kreol,
- * The University of Mauritius and the Open University offer courses in and on Kreol at graduate level,
- * Theoretical linguists at high level, in particular Prof. Dany Adone and Dr. Fabiola Henri, have done the groundwork on elucidating the Mauritian Kreol grammar, that we all already use naturally,
- * There is a national orthography prepared by, inter alia, Dr. Vinesh Hookoomsing and Dr. Arnaud Carpooran,
- * There is a growing body of literature in Mauritian Kreol,
- * The Association, *Ledikasyon pu Travayer* was in 2013 awarded the UNESCO Linguapax Prize for promotion of the mother-tongue, Kreol, and the 2004 UNESCO World Literacy Prize for its literacy work in the mother tongue.
- * There are full-length dictionaries, and a grammar handbook prepared by Dr. Daniella Police,
- * Official Communiqués by Ministries and written versions of Ministers' Speeches are already in Mauritian Kreol,

We call on your Government to introduce a Bill for a Constitutional Amendment, as part of the discussion of the plan to broadcast live. This way the Official Languages of the National Assembly become both English, as it is at present, and Mauritian Kreol, while French can still, as it is now, be used for addressing the Chair.

This means, in technical terms, amending the Constitution to add the letter and words in square brackets:

Section 49: The official language[s] of the Assembly shall be English [and Mauritian Kreol] but any member may address the chair in French.

We re-iterate our belief that, if approached in good faith, the political parties in the Opposition will agree to the Amendment.

In practical terms, the Hansard Stenographers will need a one-week training course. The Open University, MIE, LPT, or the University of Mauritius, can probably organize one, or the Speaker can perhaps call on an individual pedagogue to run such a Course.

We suggest that the Minister of Justice calls for volunteers (like the Kreol Speaking Union, academics, associations) to translate *The Constitution*, immediately, and *Erskine May: Parliamentary Practice*, over the next 6 months (all 500 pages), into Kreol. The Speaker and Deputy Speaker will need to set up a small committee of lexographers with knowledge of both English and Kreol, to discuss "Parliamentary" and "unParliamentary language".

We maintain that the process of decolonization and further democratization will also be a unifying factor for "the people" of the country.

We thank you for considering this.

Yours sincerely,

Rada Kistnasamy for LALIT, 20 October, 2015

Copy to: The Press

The Speaker, Minister of Justice Hon. Ravi Yerigadoo, Leader of Opposition Hon. Paul Bérenger.

Head of Labour Parliamentary team Hon. Shakeel Mohamed, Muvman Patriotik Parliamentary team Hon. Alan Ganoo.

Jugnauth: “Langaz Kreol deza servi dan Parlman!”

Bérenger: “Inevitab langaz Kreol rantre!”

Sa 2 sitasyon dan tit, zot montre pozisyon absird lider MSM ek MMM respektivman.

Pli drol ankor,
Aneerood Jugnauth ti deza amenn enn mosyon dan Parlman
pu fer langaz Kreol servi.
Bérenger ti sutenir li.
Me, ki finn arive, antretan?
Zot tulde finn vinn kapon. Zot mank kuraz
dibute, dir bizin permet langaz lelep dan Parlman.
Li enn zistwar ki vre, me absird.
Lir sa lartik la!

Premye Minis Aneerood Jugnauth ti ena inpe plis kuraz politik 40-an desela ki li ena zordi.

Anfet, kan li ti Lider Lopozisyon an 1977, li ti prezant enn *Private Member’s Motion* pu ki introdir langaz Kreol dan Parlman.

Sa vedir:


- a) Li ti krwar ladan.
- b) Li ti ena kuraz azir lor baz so konviksyon.
- c) Bérenger, ki ti lider mem parti (MMM), li osi li ti krwar ladan.
- d) Parti Travayis ek PMSD ti ena pli buku manb dan Parlman, zot ti “kont” alor mosyon pa finn gayn mazorite.

Alor, Jugnauth ek Bérenger dakor servi Kreol dan Lasanble depi sa lepok la, depi 38 banane – avan-mem ena lortograf ofisyel, avan-mem ena gramer ofisyel, avan-mem ena buku literatir, avan-mem ena diksyoner, avan-mem ki Kreol finn anseyne kuma size dan Lekol ek dan Liniversite, avan-mem ki li ti medyom dan Prevok BEC, avan-mem ki ti ena Linformasyon lor MBC an Kreol.

Zordi, kan langaz Kreol buku pli amenaze, kan Aneerood Jugnauth Premye Minis, ki li vinn dir? Dan sinpozyom lor “*Langaz Kreol dan Bann Institisyon*”, le 19 Novam Liniversite Moris, li dir ki Parlmanter deza koz Kreol dan Parlman! Si nu pran li alalet, tu Parlmanter kapav koz an Kreol

tultan.

Lider Lopozisyon Bérenger pa fer pli byin kan li dir dan so Konferans de Pres pandan deba lor retransmisyon Parlman andirek, ki li “inevitab” ki Kreol rant dan Parlman!



Tablo par Edvard Munch, The Scream

Sa kalite muv la – setadir pretann swa ki sanzman la finn deza arive, ubyin ki sanzman pu arive otomatikman akoz li “inevitab” - li ule dir zot tulede pena kuraz ni pu dibut anfavor sanzman ki zot-mem finn propoze e dan lekel zot-mem zot krwar, ni pu pran pozisyon kont. Sa apel kaponnri.

Swiver kuma Bhadain

Lerla, ena parmi zot swiver ki adopte mem pozisyon. Ena alye Jugnauth kuma Xavier Duval ki fek dir li anfavor, me ki chom-tayt lor sa kestyon la dan Sinpozyom lor sa-mem size la. Ena lezot kuma Minis Bhadain ki krwar so lider “kont”, alor li pran pozisyon kont. So rezon vremen exanpler: Parski nivo Angle dan Parlman deza feb. Ondire bi Parlman se pu amelyor nivo Angle bann depite.

Si seki SAJ dir, li vre – Kreol deza servi dan Parlman – e si seki Lider Lopozisyon dir li vre – li inevitab li rantre – abe, kifer tu Parlmanter avek inpe fyel apartir asterla-mem pa kumans koz bann koze serye an Kreol dan Parlman? Deza Hon. Stephan Toussaint finn fer sa.

Parlmanter bizin ena sa swa la: pu koz so prop lang maternel, lang maternel 84% popilasyon, lang vernakiler, dan Parlman – kot li pe anfet reprezant so sirkonskripsyon.

Danze Smart Cities

Pu laplipar dimunn Smart Cities pa ule dir gran-soz.

Zot krwar li konsern zis teknolozi de-pwint.

Me, anfet li maske enn sanzman grav, mem danzere:
rekolonizasyon Moris.

Sa bann anklav I.R.S. pu vinn bann “gated communities”
avek difil barble ek gardyin,
kot later agrikol pu fini betone, bayante ar etranze milyoner,
an-esanz pu drwa rezidans.

Li pu andeor tu kontrol demokratik. Li riske vinn kuma Palestinn.

Stratezi pu kree plizir *Smart Cities* finn vinn enn pilye stratezi devlopman guvernman Lalyans Lepep. Premye Minis Aneerood Jugnauth an personn finn al Dubai pu konvink milyarder vinn investi dan sa zar proze la.

Dan Diskur Bidze 2015 -16, Minis Finans Vishnu Lutchmeenaraidoo ti expoz vizyon ekonomik guvernman MSM-PMSD-ML pu realiz seki zot apel enn dezyem “mirak ekonomik” e kot konstriksyon 13 *Smart Cities* li santral ladan. An Zin sa lane la alokasyon lansman premye nuvo proze *Smart Cities* Mon Tresor dan Plaine Magnien, Premye Minis ti explik ki lobzekzif sa kalite proze la se pu fer Moris rant dan lalis bann pei avek ot nivo reveni. Pu fer sa li finn presize ki sekter prive pu ena enn rol kle pu zwe.

Me eski proze *Smart Cities* pu vremem kree fondasyon pu “dezyem mirak ekonomik” kuma Premye Minis pe promet? Eski milyar rupi ek imans siperfisi later ki pe servi pu sa kalite proze la pu kapav kree sifizaman nuvo lanplwa ase vit pu sulaz problem somaz ki pe afekte depizanpli buku dimunn, inkli zenn gradye?

Anfet proze *Smart Cities* reprezant enn lot form devlopman stil IRS-ERS ki ansyin guvernman PT-PMSD ti pe promovwar. Li viz pu ogmant valer later kapitalis sekter prive, enn sekter ki plis interese ar maximiz so profi ki ankuraz kreasyon lanplwa masif. Li enn form rekolonizasyon. E li ase efreyan. Dayer Gaetan

Siew, sef *Smart Cities*, finn anonse dan enn forom deor ki pu ena 150,000 dimunn ki pu vinn koloniz Moris, atraver sa bann *Smart Cities* la. Sa sif la osi mansyone dan dosye *Week-End*, 29 Mars, 2015. E li remansyone dan Mauritius Times 23 Novam 2015, kan enn nome Dr. Vasant Jogoo, Konsiltan dan *Sustainable Development* pe trakas lefe sa kalite invazyon masif dimunn ris dan enn pei pov. Li ule dir “reveni mwayin” pu ogmante, me pa aköz lepep pe viv pli byin, me aköz pe azut enn 15% nuvo popilasyon ki vini kuma “settlers”.

Ki ete *Smart Cities*?

Guvernman pe propoz pu kree wit smart cities ek 5 teknopol (ki servi mwins ki 50 arpan later). Parmi bann proze, ena Omnicane Mon Tresor Airport City, St.Felix Village, Medine Integrated Park, Roches Noires, Azuri Phase 2, Terra-Beau Plan Integrated Development, Highlands City e Jin Fei Riche Terre.

Ena trwa proze ki pu kumans opere an 2016. Ena Mon Tresor dan Plaine Magnien, Cap Tamarin ek Royal St Louis dan Pailles. Zis pu sa 3 la li implik investisman Rs54 milyar ek pe servi 1,256 arpan later. Totalite proze *Smart Cities* pu itiliz 7000 arpan later ek implik Rs120 milyar rupi investisman. 75% sa bann proze la rezerve pu kapitalis lezot pei e leres 25% pu kapitalis lokal ek diaspora Morisyin, si zot kapav aford.

Ena deza enn nuvo kad legal ki finn met anplas. An Zin 2015

Guvernman finn vot *Investment Promotion Regulations 2015 (Smart City Scheme)* ki definir responsabilite *Smart Cities Company (SCC)* ek nuvo antite kuma *Smart Cities Developer* ek *Smart Cities Management Company*. Seksyon sis (Part 6) sa lalwa kad la byin inportan parski li konsern lavant, akizisyon ek propriyete later ek so kondisyon ki atase. Ladan li spesifye ki enn SCC kapav vann porsyon later pu proze konstriksyon rezidans a sitwayin Moris ubyin dispöra osi byin ki etranze. Dimunn lezot pei ki aste enn rezidans valer \$US 500,000 pu gayn stati rezidan. Lalwa la osi liste enn seri exanpsyon tax ki pe ofer biznesmenn ek investiser – ki li pu seki pe devlop enn proze, aste, lwe ubyin servi kik batiman. Kuma exanpsyon depi innkom tax pu 8 an, depi VAT lor konstriksyon ek lekipman, depi *Customs Duty* lor materyo inporte ek sirtu ena gro exanpsyon lor *Land Transfer Tax, Registration Duty, Land Conversion Tax* ek *Morcellement Tax*. Alor, Guvernman pe sibvansyonn milyarder deor, pu zot vinn koloniz Moris.

Sa stratezi devlopman *Smart Cities* guvernman Lalyans Lepep pe vinn anfet etann puvwar ekonomik klas kapitalist. Li pu vedir imans porsyon later agrikol ki ti kapav servi pu devlopman lagrikiltir ek agro-indistri ki ena potansyel kree buku lanplwa tutswit, asir sekirite alimanter pei alonterm e devlop exportasyon prodwi agrikol, pu anfet bayante ar milyarder pu friktifye profi pu tablisman ek so later ki li pe bayante.

Anfet, kan byin gete, Leta pe sed enn parti kontrol ki li sipoze ena lor devlopman fonsye dan pei a sektor prive. Amenazman teritwar, travay Minis Later, travay Minisipalite ek Distrik Kawnsil, tusala pe vinn su Tablisman. Deza sa bann proze la pe sipervize par *State Land Development Company* me ki so Chermenn enn arsitek prive, Gaetan Siew, ki ti anfet dirizan parti politik apel *Ensam*, enn regrupman ki ti aliyn kat kandida dan eleksyon zeneral 2014. Aster kapitalist sektor prive ena so dimunn kuma Gaetan Siew ki azir kuma enn sef servis sivil, enn Bacha sektor prive. M. Siew ti mem form parti delegasyon ofisyel Moris an Novam dan Ghana kot li pe export konsep *Smart Cities* laba. Gvernman Ghana finn interese pu lans DAWA Smart City lor enn terin 20 hektar.

Anfet depi inpe letan sektor prive finn lans zot dan gran proze alonterm pu konstrir zot prop lavil, zot prop infrastruktir. Medine finn elabor so Master Plan 2005-2025. Li finn deza uver so lekol ek liniversite. Omnicane so kote finn deza elabor enn *Urban Master Plan* pu Mon Desert-Mon Tresor pu ziska 2065. Kapitalist pe met dibut zot prop infrastruktir paralel. Dan Honduras ena mem bann rezyon antye apel ZEDE (*Zone for Employment & Economic Development*), su kontrol prive, ki ena zot prop sistem legal andeor zidisyer. Ena plizir avoka, aktivist finn kritik ZEDE akoz li menas suverennte pei ek drwa sitwayin pu kontrol later pei.

Dusman-dusman gvernman eli ena mwins kontrol lor desizyon ki konsern amenazman teritwar, lor kimanyer itiliz later dan fason optimal, lor oryantasyon devlopman ekonomik alinteryer teritwar nasyonal.

Kot lide la sorti?

Anfet, ena enn gran eskrokri otur sa term “Smart City” la. Seki pe promuvwar li pretann ki zot pe

koz lor teknoloji. Me, anfet, zot pe amenn enn nuvo kus sosyal (milyarder) pu koloniz pei.

Anu get kot sa term la sorti. Bann ki pe propaz *Smart Cities* pe pretann asterla ki *Smart City* li pa nuvo. Li date, dapre zot, osi lwin ki lepok invansyon robo otomatik pu trafik, ki ti introduran 1922 dan Houston, dan Lamerik. Zot osi servi lexanp tablo indikater pu trin ek metro. Me avek devlopman inninternet ek miniatirizasyon elektronik konsep la finn kristalize otur zimaz lavil kuma enn imans robo efisyan ek finn akapare par konpayni zean dan teknoloji kuma IBM, CISCO, Software AG ki ti pe rod benefisy gro kontra depi bann minisipalite. Ena gran lavil kuma Songdo dan Sid Kore ki finn konstrir lor baz sa kalite konsep la. Laba tu so batiman ena klimatizer otomatik ek zot akse kontrole par kompyuter santralize, tu so sime sistem dilo, elektrisite servi sennsor elektronik ki swiv e risponns a muvman bann rezidan. Tu laspe lavi dan Songdo kumadir su kontrol ek sirveyans laparey elektronik kontrole par gro konpayni sekirite prive. Li fer rapel George Orwell so ‘Big Brother’. Me Songdo ti sirtu konsevwar kuma enn zarm lager komersyal ki ti viz pu atir miltinasyonal ki opere dan Lazi atraver tu kalite

fasilite tax ek reglemantasyon ki favoriz investiser.

Dan Lend, Premye Minis Modi finn promet pu konstrir 100 *Smart Cities* ziska 2020 pu kompiyt ar Lasinn ki pe inklir *Smart Cities* kuma pilye so plan irbanizasyon. Dan Lamerik Prezidan Obama finn anonse an Novam ki so gvernman pe deburs 160 milyon dolar pu fer sertin lavil ek rezyon ‘smart’.

Me, kan byin gete, li paret ki ena presyon depi 3 kalite bezwin kote kapitalist: enn bann ki pe devlop sa teknoloji la, enn kote; enn lot bann kapitalist an-tan ki famiy o-nivo burzwazi mondyal, ki ule res dan “*gated cities*”, setadir avek difil barble ek gardyin, pu separ li depi “*lamas*”; ek trwazyeman, ena proprieter later ki ule fer spekilasyon lor lavant so dibyin.

Percy Mistry so lide dyabolik

Dan Moris, lide pu dekret bann batiman ek rezyon ‘smart’ finn demare avek Ebene Cyber City. Dirizan MSM ti pe mem koz pu fer Moris antye vinn enn Cyber Island. Gvernman N. Ramgoolam-X. Duval ti ankuraz devlopman proze morselman odegam prive stil IRS ki finn vinn kuma bann geto avek so vila anture ar miray beton arme, so gayt elektronik, so sistem sirveyans prive kuma ena Tamarin, Gran Baie, Moka,



Desin Picasso, Toro ek Seval

Belle Vue. Me sa bann nuvo sektor kuma Cyber City ek IRS ki servi buku teknolozi kompyuter finn kree byin tigit lanplwa, sirtu pa dan prodiksyon.

Seki finn ek pe inspir konsep *Smart Cities* Moris se bann lide Percy Mistry, enn ex kad Labank Mondyal. Dan enn interview dan *Mauritius Times* an 2011 li dir ki Moris antye bizin vinn enn *Smart Island* kuma Singapur pu bann milyader depi Lazi, Lafrik ek Lostrali. Ala seki li deklare : *“In my view the future of Mauritius lies in becoming: ... the world’s most attractive and pleasant island city-state that is a globally tax-efficient home to Asia’s, Africa’s and Australia’s billionaires with infrastructure and governance to match ...”*

Li bon note ki Percy Mistry enn dimunn avek lide dedrwat, ki anfafer demantelman Welfer Steyt ek privatizasyon servis lasante. Dan *New Statesman* 8 Fevriye 2008 li finn deklare: *“You [must] get rid of this notion that everything should be universalised for everybody -- that everybody should have free education, free health, free transport”*. Percy Mistry anim regilyerman seminar pu konpayni prive dan Moris. Li enn veritab ideolog anfafer bayant later Moris ar milyoner deor.

Proze *Smart Cities* ki guvernman Lalyans Lepep pe inisyse riske diviz Moris an 2: *Smart Cities* zere par konpayni prive, kot zis dimunn ris reste avek infrastruktitir ki servi ot teknolozi ek tu fasilite pu transpor, lwazir ek lot kote livil ek vilaz kot sirtu travayer ek dimunn mizer reste, kot Minisipalite ek Distrik Kawnsil pena preske resurs ditu pu asir servis nesaser pu so abitan. Seki nu truve dan Palestinn, nu riske s truve Moris.

Sa kalite stil devlopman ki Lalyans Lepep pe aplike li pa dan lintere lepep. Li pu ogmant puvwar klas kapitalist, amenn mwins demokrasi e li enn reset pu eksplozyon sosyal. AA

LALIT Website Hits Reach One-Million in past Six Months

Dan so 12 an lexistans, websayt LALIT finn dusman-dusman gayn pli buku, pli buku viziter.

Avek nu sistem fasil kot diferan manb ansarz diferan laspe nu sayt li vinn relativman leze pu gard li azur. Ena manb ansarz nyuz, lot ansarz dokiman, lot ansarz odyo, lot video, lot foto, etc. Pa manke vizite suvan!

LALIT’s website has constantly gained in visitors, pages opened, files downloaded, and straight hits. This year, from mid-May to this far in November, we have had over a million hits. That is in less than 6 months.

Beginning in 2003 with a few dozen hits a month, www.lalitmauritius.org has continued to grow exponentially. The newsfiles, audio files including Soundcloud, video files including Youtube, document files and image files, are all accessed on a daily basis.

Out-reach

Our website together with our hard copy bi-monthly magazine are our main forms of in-depth communication with people outside of LALIT. About once every two months, in addition, we distribute about 8,000 leaflets in the main bus stations in the early morning to working people on their way to work. This choice of time to distribute means people read and share it while waiting for transport to work, in their transport, at work, and then at home as well. We also use e-mail communications and SMS. And once or twice a year, depending on the situation, we do poster campaigns on an issue. At the moment our posters are on the need to introduce Kreol as one of the languages used in Parliament.

But, of course, a party like ours depends a great deal on its own network of branches, as a means of communication; it is two-way communication and from the grass-roots to the centre of LALIT and back again. And our expansion depends on ever-increasing distribution, and discussion, of our hard-copy magazine, because of its particular nature as a constant analysis of reality and bringing together of political strategies into a coherent whole.

Varied forms of communication

Having our own forms of communication is essential to a party like LALIT. This way we can both benefit from the fairly constant radio-interviews (that are sought from our leading members by the private radio stations) and from the odd article in the mainstream press, without being wholly dependent upon these commercial media, which, in addition to being capitalist concerns, themselves, are often not without their own “partisan” political agenda. Parties, and indeed any organizations, that develop a dependency upon the bourgeois media are soon influenced by the need to accommodate the editors, owners and controllers of these pro-capitalist outfits.

08.11.2015

Muvman Liberasyon Fam organiz *All Women's Convention* lor "Fam anfaver Prodiksyon Alimanter"

Apré ki LALIT finn lans so kanpayn pu enn lekonomi alternativ, anfet ena lezot lorganizasyon ki finn zwenn dan sa muvans la.

Par exanp, Muvman Liberasyon Fam.

Li finn fer sa Konvansyon la avek bi pu liye ansam prodiksyon alimanter, kreasyon anplwa, reform agrer ek sekirite alimanter.

Pandan Konvansyon la, tu fam prezan ti byin ankoler avek proze Smart Cities, e li finn vinn enn parmi bann rezolisyon pu kareman opoz sa rekolonizasyon Moris la.

Muvman Liberasyon Fam ti organiz enn *All Women's Convention* Dimans le 25 Oktob GRNW pu reflesi lor kimanyer pu al ver enn nuvo mobilizasyon anfaver prodiksyon alimanter lor gran lesel ki pu anmemtan asir sekirite alimanter ek kree lanplwa masif.

Ti ena prezan pu sa demi-zurne refleksyon manb lasosyasyon fam dan kartye, manb sindika, etidyan kolez, etidyan liniversite ek manb, sinpatizan MLF.

Rajni Lallah, ki ti prezide, ti sitye tem Konvansyon. Pu fasilite deba an gran grup, 8 manb MLF sakenn a turderol finn fer enn introdiksyon byin kurt lor diferan laspe:

1. Mank vizyon Gvernman ek Lopoziyon lor Prodiksyon Alimanter

Shabeela Kalla-Monach ek Ragini Kistnasamy ti introdri sa seksyon la.

Kan pri disik pe kontiyn bese, li klerman finn ariv ler pu konverti later su kann, pa an later pu ranz *Smart Cities*, IRS ek ankor morl, me pu plant manze lor gran lesel. Kan Aneerood Jugnauth prezant nuvo gvernman Lalyans Lepep so "*Mission Statement 2030*", pena okenn mansyon prodiksyon alimanter.

Politik gvernman pu prosenn 15 an pu santre otur kree *Smart Cities* me li pa explike kuma *Smart Cities* pu kree lanplwa masif ki pu kapav adres problem somaz. Sa politik gvernman

pu anfet betonn lavenir. Enn tel politik pu diminye siperfisi later agrikol e seki pli grav, li limit nu potansyel pu re-striktir lekonomi e uver vizyon pli vast pu lavenir. Li riske amenn enn rekolonizasyon.

Lopoziyon parلمانter, osi, pena okenn kritik koeran kont enn tel politik ekonomik ni pena okenn vizyon lor kimanyer pu restriktir lekonomi.

2. Frazilite stratezi "tit antrepriz"

Marlene Joseph ti dir, fas-a somaz, Gvernman pe ankuraz fam pu pran bann lonn pu mont zot prop lantrepriz. Li enn latrap parski anfet buku fam pe fini avek enn antrepriz an fayit e lor la, avek det pu ranburse.

3. Nesesite Sekirite Alimanter

Anne Marie Sophie ti fer rappel ki MLF ti enn manb fondater *Fron Sekirite Alimanter* e finn donn kudme dan elabor e ti enn bann sinyater ansam avek 10 lezot lorganizasyon *Sart Sekirite Alimanter* an 2008. Prodiksyon manze lor gran lesel li pu kree anplwa masif, li pu anmemtan asir sekirite alimanter e usi, kan expote, sa pu raport deviz ki pu ede pu konsolid balans peyman.

4. Kreasyon anplwa lor gran lesel par prodiksyon agro-alimanter

Rajni Lallah ti zet enn bref kudey lor travay fam dan listwar prodiksyon alimanter, e lor lavenir travay fam dan gro

lantrepriz prezervasyon ek konservasyon manze.

5. Sityasyon dan Rodrig

Sadna Jumnoodoo ti donn enn introdiksyon baze lor analiz manb MLF dan Rodrig. Diferans ant patern propriete later dan Lil Rodrig (kot Gvernman proprieter) ek dan Lil Moris (kot tablisman proprieter) lapli-par later. Kimanyer dan Rodrig, usi, ena enn mank enn vizyon koeran Gvernman lor plantasyon, elvaz ek lapes. Kot ena mezir pu stimil prodiksyon, pa finn stabiliz pri ek kot pena mezir pu ogmant prodiksyon, ena pri garanti me pri garanti tro ba pu permet re-investisman.

6. Responsabilite fam pu manze

Prodiksyon manze, Veronique Topize ti dir, li enn kestyon ki konsern fam pu plizyer rezon me li, sirtu, akoz fam ki responsab pu nuri fami tulezur e se fam ki bizin organiz bidze lakaz pu rul lakuzinn pandan enn mwa.

7. Akse a later ek reform agrer

Ragini Kistnasamy ti koz lor nesosite ki tu dimunn ena akse a later pu plante. Depi lesklavaz pas par langazman, tu bon later agrikol, eksepte dan Rodrig, finn res dan lame tablisman disik. Okenn gvernman depi Lindepandans ziska zordi pa finn vinn avek enn reform agrer. Zordi pe konverti later agrikol an batiman beton, terin golf, IRS u *Smart Cities*. Gvernman

anplas pa zis pena vizyon me pe blok vizyon pu enn meyer lavenir.

8. Lamer ek lapas

Begum Badullah ti dir ena enn mank vizyon Guvernman pu devlop resurs lamer, sirtu enn lindistri lapas sutenab dan Moris ki kontrol 2.5 milyon km² lamer.

9. Mobilizasyon ek vizyon

Lindsey Collen ti dir ki, pu sorti dan linpas kot nu ete zordi, li inportan ki mobilizasyon bizin fer ansam avek enn program kler. Enn program li pa zis enn lalis demand me li bizin al ansam avek enn konpreasyon kot nu ete zordi e kimanyer atraver nu bann demand pu sorti kot nu ete pu al ver kot nu pe ule ale. Enn program li viz pu batir so lafors pa telman par “gayn lamas” antan ki individi ar li (sa se popilism), me par konvink dimunn organize dan korporativ, lasosyasyon, klib.

Finn ena enn deba byin anime e anprofonder. Ena 9 pwin ki finn sorti kuma enn premye draft enn program pu mobilizasyon.

1. Aret bayant later agrikol a bann milyoner
2. Leta bizin ankuraz prodiksyon alimanter ki deza ekziste
3. Leta bizin fors tablisman pu fer plantasyon manze an antreliyn lor tu later kann
4. Leta bizin aret ankuraz kann ek disk
5. Bizin devlop lindistri lapas kot dimunn ena kontrol
6. Bizin liber akse a later pu ena kontrol kolektif lor kimanyer pu itiliz later
7. Guvernman ena responsabilite pu kree travay stab avek bon kondisyon pu tu dimunn, inklir fam.
8. Guvernman bizin garanti ki deza ena fasilite stokaz, lizinn prezervasyon e transformasyon *anplas* avan ki ena premye gran rekolt agrikol, vas pu dile, labataz zanimo e prodwi lapas fini lapas.
9. Kondisyon travay dan sekter prodiksyon alimanter bizin ot-nivo avek bann fasilite twalet dan karo e travay

semenn 40-er.

Komite MLF inn gayn responsabilite pu re-drafte sa program 9 pwin baze lor minits konvansyon e usi kit pwin inportan depi *Sart Sekirite Alimanter 2008* inportan (sakenn prezan ti gayn enn kopi Sart Sekirite Alimanter e enn kopi analiz manb MLF Rodrig lor “Lagrikiltir Zordi dan Rodrig: Ver enn Program”).

Li finn ankor pli inportan ki nu kontinye mobilize anfaver enn politik ki viz sekirite alimanter, ki viz anlwa pu tu dimunn, prodiksyon manze pu asir sekirite alimanter e pu exportasyon. Sa program 9 pwin li kumansman enn platform

pu sa nuvo mobilizasyon fam. Li enn kontinyasyon travay MLF an 2008 dan Fron Sekirite Alimanter.

Manb prezan ki dan sindika, dan sosyete fam, dan lasosyasyon, u etidyan finn propoze ki manb MLF vinn anim renyon pu ki partaz e kontinye aprofondi deba pu devlop sa program mobilizasyon ki finn kumans elabore dan Konvansyon. Dayer, enn premye reynion kumsa finn fer Zedi 3 Desam kot CTSP avek fam manb. 3 manb MLF finn anim reynion avek 40 fam travayer. Enn seri rezolisyon finn vote.

BK

LALIT OPOZ MENAS GAYAN

Obligasyon Prezant ID Kard Lopital?

Minis Lasante Anil Gayan finn anonse, dan Lasanble Nasyonal Mardi 17 Novam, ki prezantasyon Kart Idantite pu obligatwar pu gayn swin dan lopital ek lezot servis lasante piblik. Li pa finn presize kan sa pu rant an viger. Minis finn konfirm stratezi Guvernman pu fer servis lopital vinn peyan pu etranze. Ena 2 problem avek sa stratezi la. Dabor li met enn fardo lor tu pasyan an zeneral; ena enn traka adisyonel kan u deza malad, ena enn presyon pu ki tu pasyan sarye kart idantite avek zot kan zot pe al rod tretman dan lopital ek dispanser. Answit, travayer ki sorti lwin pu vinn travay lor kontra dan lizinn ek konstrikshon Moris, ti bizin o-minimem gayn swin lopital gratis. Si nesaser, Guvernman kapav “*claw-back*” larzan depi patron ki fer amenn sa bann travayer la.

Pu zistifye so desizyon bankal, Minis Gayan pe kasyet deryer enn swadizan “modernizasyon” sistem lasante dan Moris ki pu sipozeman fasilite ek optimiz resurs lopital. Me, Minis Gayan, antan ki enn birokrat notwar,



pu pe optimiz resurs lopital, me okontrer, pe fer lopital ek zot staf vinn birokrat, a zot tur, avek so lurder asosye ar sa, alor ki akse a swin dan lopital li enn drwa pu tu dimunn.

Dan *Lalit* nu truv sa absoliman inakseptab ki inpoz kart idantite lor pasyan kuma enn kondisyon pu gayn tretman lopital, e nu fer demand formel pu Minister Lasante revinn lor sa desizyon la.

SK

Dr. Madhewoo gayn fever pu fer lapel

Lakur Siprem finn finalman donn dan so verdik le 24 Novam dan ka Dr. Madhewoo e finn akord li permisyon fer lapel divan *Privy Council* kont zizman ki samem Lakur ti done sis mwa desela, komkwa inplemantasyon nuvo kard idantite biometrik pa vyol Konstitisyon Moris.

Me, Minis Bhadain pa finn fer okenn lanons, mem kan Zizman dir pa bizin donn lanprint antretan.

Pa oblize dan lanprint antretan

Seki interesan note se lefet ki Ziz Balancy ek Caunye dan zot zizman finn inkliir enn ‘*stay of execution*’ konsernan lanprint, zot ekirir ki pa kapav exiz Dr. Madhewoo so lanprint pu nuvo kard ID ziska ki *Privy Council* pronons li lor so lapel.

Sa ruling la klerman bizin aplikab pu tu adilt ki pe al tir zot kard ID ubyin konverti ansyin. Guvernman klerman oblize etann dat validite ansyin kart, ki sipoze expire lafin Zanvye 2016. Me, Guvernman telman an debandad ki li pa tir okenn kominike naryin. Li zis chom tayt.

An paralel avek ka lakur, *Kolektif kont ID Kard Biometrik Obligatwar*, dan lekel LALIT manb, finn amenn enn batay politik konstan, ki finn obliz MSM ek MMM sanz zot pozisyon pu zot osi vinn kont ID kard e finn fors Guvernman Layans Lepep detrir databeys santralize. Asterla, nu bizin met presyon avan ki Guvernman mem dir ki li pe fer, swit-a zizman la.

Li irzan zordi ki Lasanble Nasyonal vot enn nuvo kad legal pu ID kard ki respekto liberte individyel, dinite, integrite imin e ki koresponn a enn sosyete modern ek demokratik.

SIKSE PU PREMYE FESTIVAL Festival Fim Palestinn

AA

Premye Festival Fim Palestinn *Anu al Palestinn san Pey Pasaz* ti organize konzwinman par LALIT, *Confederation Travailleurs Secteur Prive* (CTSP), Centre Idriss Goomany (CIG) an kolaborasyon avek Film Klib e *Muvman Liberasyon Fam* (MLF). Li ti Samdi le 31 Oktob 2015, dan kad *Zurne Internasyonal Solidarite avek Lepep Palestinn* enn mwa plitar.

An 1997, Nasyon Zini ti vot enn rezolisyon pu dekret le 29 Novam *Zurne Internasyonal Solidarite avek Lepep Palestinn* pu rapel tu Leta ek Lepep dan lemond sa dat ki simboliz “Partisyon Palestinn” an 1947 e kreasyon Leta Israel. Sa rezolisyon li rapel dat 29 Novam 1947 kan Lasanble Nasyon Zini ti adopte *UN Resolution 181(II)*, rezolisyon Partisyon Palestinn.

Lazurne solidarite ti enn gran sikse lor plizyer plan. Plis ki 250 dimunn inn prezan pandan trwa prozeksyon-deba. Vwayaz pandan lazurne kumanse dan Jenin pas par Jaffa e al termine dan Bi’lin inn donn tu dimunn prezan enn kudey andan teritwar okipe. Sa li enn fason pu briz silans ki Israel avek konplisite medya meynstrim sey garde lor atosite lokipasyon Leta Israel ek so larme dan Palestinn.

Festival Fim Palestinn li ti enn fason pu aktivis anfaver lalit Palestinyin dan Moris pu selebre lalit eroik e diyn lepep Palestinn. E, li ti usi enn aksyon pu met presyon lor leta Moris pu li kumans azir kont lokipasyon militer ek kolonizasyon Palestinn, ki pe kontinye anexe later Palestinn, ki pe fud tu rezolisyon Nasyon Zini. Anmemtan, li ti enn lokazyon pu popolariz muvman BDS, *Boykot, Dezinvestisman ek Sankasyon*.

Pu lekter *Revi LALIT* ki finn rat sa vwayaz enn zur dan

Palestinn, nu pe fer enn reportaz lor sa lazurne solidarite. Ti ena prozeksyon 3 dokimanter: premye ti gramatin dan kartye zeneral LALIT GRNW, dezyem ti dan lazurne kot horl federasyon CTSP Rozil e trwazyem ti 8.30 aswar dan horl Sant Idriss Goomany Plaine Verte. Ti ena plis ki 250 dimunn prezan dan sa 3 seans prozeksyon. Lasal ti ranpli net dan GRNW ek Plaine Verte. Deba apre fim ti byin anime kot manb dan lasistans inn pran pozisyon an faver kanpayn BDS e finn donn zot nom pu partisip dan sa aksyon konkre solidarite avek lalit dan Palestinn.

Lor 3 fim-dokimanter

Arna’s Children (2004, par Juliano Mer Khamis ek Danniel Danniel), enn dokimanter lor enn grup teat zanfan dan Jenin dan teritwar okipe Palestinn ki ti met dibut par Arna Mer-Khamis. Dokimanter li lor Arna, enn Israelyenn ki ti ne dan enn fami Zwif ki ti enn siporter Israel kan li ti zenn e apre li vinn enn aktivist politik anfaver lalit Palestinyin pu laliberte. Li enn omaz a kontribisyon enn fam eksepsyonel ki finn kree enn lespas pu zanfan Palestinyin dan Kan Refizye Jenin. Mem, kan li pe lite kont kanser, li kontinye truv lafors pu rul sa Sant ek Grup Teat Zanfan dan Kan Refizye Jenin ki ti pe ed bann zanfan pu exprim zot koler atraver teat. Fim la temwayn lavi zanfan ki pe grandi dan Kan Refizye Jenin ki truv andan Palestinn okipe e kimanyer atraver teat ‘bann zanfan Arna’ sey sirviv sa realite lavi tulezur su lokipasyon militer larme Israel.

Jaffa, mecanique de l’orange (sorti an 2010 par Eyal Sivan), expoz sa fos propagann otur zoranz Jaffa ki sey fer lemond kwar ki Israel so bann pyonye

sanse ki'n'n fer zoranz puse dan dezer abandone kot pa ti ena nanyin. Nu ariv konpran ki zoranz Jaffa ti existe e ti pe exporte byin avan ki Leta Israel konfiske later ek lizinn apre ki li fors abitan Jaffa fwir zot lakaz, atraver enn kanpayn terer. Anfet Leta Israel, amezir li pe pran nesans, li bombard ek piy Lepor Jaffa. Jaffa, dapre laliyn Nasyon Zini (*Green Line*), sipoze form parti Palestinn ti tu simpleman annexe par Israel atraver enn kanpayn terer.

Cinq Cameras Brisées (sorti an 2011 par Emad Burnat ek Guy Davidi) atraver kamera resi kapte lalit abitan vilaz Bi'lin kont Israel so Miray Aparteid. Emad, enn peizan ki viv dan vilaz Bi'lin. Fim la reysi donn nu enn vi depi andan sa vilaz kumadir nu ti laba dan sa lalit la e li enn omaz a abitan Bi'lin ki pandan 5 an finn amenn lalit kont Leta Israel ki ti pu anserkle zot vilaz avek enn miray ki ti pu kup zot depi leres Palestinn. Zot finalman resi gayn enn viktwar par sanz trase miray pu ki li pa kup vilaz.

Dan seremoni uvertir GRNW, Ansyin Prezidan Repiblik M. Cassam Uteem ti kumans so diskur par rapel lalit eroik lepep Palestinn e denons responsabilite Lamerik kuma prinsipal furniser zarm a Leta Israel e par aktivman sutenir politik rezim Zionist. Li finn usi analiz sityasyon zordi avek lamonte ISIS/Da'esh ki rezilta direk lager ilegal Bush-Blair kont Lirak an 2004. Alain Ahvee ek Ragini Kistnasamy dan zot intervansyon avan prozeksyon e dan deba, finn liye zot lexperyans dan lalit ansam avek lepep Palestinn kont Miray Aparteid, kont lokipasyon militer lor chekpyont a nuvo sityasyon zeo-politik zordi. Reeaz Chuttoo, Jane Rago, Imran Dhannoo, Norman Tambanivoul ek Ally Lazer, ti usi pran laparol pu sutenir lalit Lepep Palestinyin.

Enn pwin inportan dan deba fer par Ram Seegobin, Rose-



Desin Chagall, *The Man with the Sentry*

Hill, kot li finn explik dan enn fason byin kler kimanyer enn boykot marse: li pa zis enn dimunn refiz aste 2-3 zoranz Jaffa. Byin sir si ena par milye dimunn pe refiz aste zoranz Jaffa, li ena enn lefe ekonomik e lerla enn lefe politik; enn boykot efektif se kan sakenn dant nu, kan nu al Winners ubyin Shoprite, dimande for-for pu ki tu lezot dimunn dan sipermarket tande, parski li nu drwa pu kone kot sa zoranz la sorti e si li pena label, nu kapav dimann pu get so bwat kartron pu kone ki pei li sorti. Sa konversasyon fer dan enn fason poli ek kalm, li anfet baz pu ki enn boykot marse. Kan nu pran pozisyon piblik, nu explike piblikman kifer nu pa aste zoranz sorti depi Israel, nu explik lokipasyon Palestinn par Leta Israel, se sa nu kontribisyon. Partisip dan enn boykot li fer u devlop kapasite individyel pu fer enn travayer sipermarket u enn lot kliyan dan sipermarket dakor avek u (an piblik) ki li pa posib kontinye sutenir enn Leta kuma Israel kan so larme pe kontinye okip Palestinn e ki bizin izol Israel atraver nu aksyon kuma sa boykot la.

Apre sak evennman manb dan lasistans finn donn zot nom pu donn kudme avek kanpayn BDS e finn usi ena plizyer demand pu organiz prozeksyon-deba sa 3 fim dokimanter dan zot landrwa pu kontinye kanpayn pu konpran linportans ki nu dan Moris nu sutenir lalit dan

Palestinn e kimanyer nu kapav azir pu met fin a inpinite Leta Israel ek so larme pu tu zot krim kont lepep Palestinn.

Zordi sityasyon dan Palestinn e dan rezyon Mwayin Oryan pe deteryore tulezur. Li vinn ankor pli kritik ki otan dimunn inn partisip dan sa vwayaz enn zurne dan Palestinn kot nu finn konpran lavi su lokipasyon. Zordi li vinn ankor pli inportan ki nu kontinye batir sutyin a lalit Lepep Palestinn.

Festival dan Kontex

Festival Fim Palestinn Oktob 2015 ti enn aksyon dan Moris pu mark nu solidarite avek lalit eroik Lepep Palestinn. Sa lalit la finn dire pu 67-an pu drwa a enn pei, ek pu 48 an kont lokipasyon militer teritwar Palestinn par Leta Israel. An 2015, kan nu pe mark sa zurne solidarite, nu bizin gard an tet ki Xavier Duval, Vis-Premye Minis Moris, dan so riportbak apre enn vizit Betlehem lor 'turism' dan Palestinn finn pran pozisyon an faver sutyin lepep Palestinn. An 1997, Leta Moris ti vot an faver sa rezolisyon pu dekret enn zur solidarite avek Lepep Palestinn. Alor, inn ler pu ki Guvernman Moris azir e montre ki li an faver drwa Lepep Palestinn:

* San tarde, Guvernman bizin invit Reprezantan Palestinyin uver enn Konsila dan Moris. Anmentan, Guvernman bizin kas tu lyin diplomatik avek Leta Israel e kontribye aktivman pu izol Israel diplomatikman.

* Guvernman bizin fer enn lapel piblik pu enn anbargo zarm lor Mwayen Oryan (sirtu a Lamerik ki prinsipal furniser zarm a Leta Israel), inklir Israel.

* Guvernman bizin donn sutyin muvman mondyal BDS (Boykot, Dezinvestisman ek Sanksyon) kont Israel ziska ki Leta Israel met fin a so lokipasyon militer Palestinn

BK

(Get nu let a Premye Minis lor sa 3 pwin la.)

Open Letter To The Prime Minister On Palestine

Ala enn let uver konzwin a Premye Minis
ki finn siyne par Cassam Uteem, CTSP, Centre Goomany,
Muvman Liberasyon Fam, LALIT.

Sa let konzwin li swiv Festival Fim Palestinn
organize par bann mem lorganizasyon ek individi,
e li form parti nu travay suteni
kont kolonizasyon par Israel, kont lokipasyon later Palestinn,
e anfaver lalit lelep Palestinn

Dear Sir,

We write to you in the context of the UN *International Day of Solidarity with the Palestinian People*, November 29, to make a formal request that the Government take a political initiative to rally regional support around a three-pronged position to force Israel to pay a political price for its immoral and illegal actions in Palestine.

We thus call on the Mauritian State to take the initiative and to use its influence in such forums as the COI, SADC, the African union, the Non-Aligned Movement towards rallying around a common position in favour of the following three-pronged position:

1. To isolate Israel politically:

In particular, to freeze diplomatic relations with the State of Israel, and maintain a freeze until the end of occupation and until a halt to colonisation of Palestine; simultaneously to *open a Palestine Embassy in Mauritius, while calling on all other States to do the same.*

2. Arms embargo:

To call for an immediate arms embargo on the Middle East, *including Israel, so that these sanctions cut off the supply of weapons and military aid from Europe and the United States, on which Israel depends for the war crimes it commits;* we remind you that during the Israeli invasion and bombing of Lebanon in July 2006, Lalit coordinated a petition to the UN

General Secretary to demand an arms embargo on the Middle East. This is on the agenda today as we submit these demands to you.

3. Boycott:

The suspension of all commercial ties and trade with Israel.

In the past week, we have witnessed horrific attacks where many people lost their lives and many more were wounded – in Beirut, Baghdad, Paris and Bamako. These strikes against civilians have been claimed by and attributed to members of The Islamic State, ISIS or Al-Qaeda factions. ISIS/Al-Qaeda did not arise out of nothing at all. It is rather a result of the endless US-and-allies military involvement in the Middle East, including the U.S. direct political, financial and military support to the State of Israel, the bombardment and illegal U.S. invasion and occupation of Iraq, intense military support in the conflict in Libya, Syria and the Yemen. It is this, plus the financing of so-called “rebels” who end up fuelling ISIS, that forms the continuing context for much of the indiscriminate violence in the Middle East and moving from the Middle East to Europe and Africa. It is this that has created the chaos that has brought only destruction and sectarian division. But, the solutions will come from the people of the region – not the imperialist militaries that created the chaos. Campaigns aimed at ending all military ties with Israel are vital for ending violence

and are a key component of the international, Palestinian-led Boycott, Divestment and Sanctions (BDS) movement. A military embargo on Israel, similar to that imposed on apartheid South Africa, is not just a vital form of solidarity with Palestinian popular resistance; it is a legal obligation. All states and the United Nations are obligated to hold Israel to account by adopting measures that will bring to an end its serious breaches of international law. This is a reminder of the responsibility of Mauritius as a state member of the UN.

But we also realise that the end of military occupation and colonisation of Palestinian land will depend also on the mobilisation of the people of Palestine and on the active support of progressive people and organisations in Israel. So this political move will at the same time express solidarity with the different mobilisation campaigns in Palestine and Israel against the siege of Gaza and against Israel’s military expansionist policy in general.

For 67 years, the people of Palestine have waited for their right to a country. For 48 years, the state of Israel has illegally occupied West Bank, East Jerusalem and Gaza which are Palestine territory. There has been growing international support for the rights of the Palestinian people. Recognition of statehood for Palestine in the United Nations has only formalised this long quest for justice. Since the start of October, Palestinians

have been taking part in mass popular resistance to Israeli settler colonisation and military occupation of Palestine. Tens of thousands of people joined in huge demonstrations in Hebron, Jerusalem, Ramallah, Bethlehem and across Palestine. Israel's repression of this on-going uprising has been brutal. Israel has killed 74 Palestinians, mostly unarmed protesters and bystanders, including 15 children and a pregnant woman. More than 2,000 civilians have been shot with live and rubber coated bullets. More than 1,350 Palestinians have been arrested. Earlier this week, Israel approved an additional 450 houses to be built in illegal settler colony on stolen Palestinian land in occupied East Jerusalem. In Tel Aviv, people demonstrated against Israeli government's policies and called for a political solution to the Israeli-Palestinian conflict.

In Mauritius, the success of the recent Palestine Film Festival held in October 2015 jointly organized by LALIT, the *Confederation Travailleurs Secteur Privé* and the Idriss Goomany Centre, in collaboration with the Film Club and the *Muvman Liberasyon Fam* shows that the number of people taking a stand in favour of the Palestinian people is now beginning to grow.

The European Commission on 11 November 2015 adopted an "interpretative notice" on the indication of "origin of goods" from the territories occupied by Israel since June 1967. Through this *interpretative notice*, long overdue, the EU ensures that its legislation applies to Israel within its internationally recognised, i.e. pre-1967 borders. The EU has a privileged trading relationship with Israel under the Association Agreement which gives products originating in Israel benefit from preferential tariff treatment upon their entry into the European union. Products from Israeli



Desin Georges Grosz

settlements exported into the EU do not benefit from any preferential trade treatment. For products from West Bank or the Golan Heights that originate from settlements, an indication limited to 'product from Golan Heights' or 'product from West Bank' would not be acceptable. In such cases the expression 'Israeli settlement' or equivalent needs to be added, in brackets, for example. Therefore expressions such as 'product from the Golan Heights (Israeli settlement)' or 'product from West Bank (Israeli settlement)' must be used.

All these initiatives show the growing movement against Israel inside Palestine, in Israel, itself, and at an international level. Mauritius must be part of this wave of solidarity and protest.

Without pressure and isolation, the Israeli regime has proven time and time again that it will continue such massacres as we continue to see, and prolong the decades of military occupation. The rogue State of Israel has continued to build the Apartheid Wall on Palestinian land in the West Bank in defiance of the ruling of the International Court of Justice (ICJ) that the Israel's Apartheid Wall in the West Bank is illegal under international law. Through rallying support around

the three-pronged position, the State of Mauritius, under obligations as outlined in the ICJ decision, will join the call to demand that Israel is held accountable for ignoring the ICJ's ruling.

All this explains our formal request to your government to take the initiative in Parliament, at home, and such forums as the COI, SADC, the African union, the Non-Aligned Movement, abroad, towards rallying around a common position in favour of this three-pronged position. In this way, through our elected representatives, we can take our historical responsibility and force Israel to pay a price for its immoral and illegal actions, thus making it reconsider and eventually end its use of military force against the Palestinian people and their organisations. Mauritius will thus join the growing international voice in support for the legitimate aspirations of the people of Palestine for peace, justice and freedom.

We hope that you will consider our proposal and contribute towards forcing the Netanyahu regime to act according to international law and to take firm steps to end the illegal occupation and continued colonization of Palestine, and thus pave the way for peace in the Middle East.

Yours sincerely,

Cassam Uteem, Former Head of State of the Republic of Mauritius
 Norman Tambanivoul for *Centre Idriss Goomany*
 Jane Ragoo & Reeaz Chuttoo for *Confederation des Travailleurs du Secteur Privé*
 Shabeela Kalla-Monasch for the *Muvman Liberasyon Fam*
 Ragini Kistnasamy & Alain Ah-Vee, for LALIT

23 November 2015

Enn Kritik Lor Stratezi “Gender Empowerment”

Suvan dimunn pa truv ladiferans ant lalit pu emansipasyon fam ek lalit pu enn-de fam monte dan yerarsi patriarkal.
Ala enn explikasyon.

Lindsey Collen ti pran laparol akote Dr. Krish Poonoosamy Minisipalite Quatre Bornes Samdi 24 Oktob dan enn deba piblik lor tem: “Gender Empowerment and Decision Taking”. Deba la ti organize par nuvo lasosyasyon apel “Gender Empowerment Association”. Dan cher ti ena Mm. Ranjita Bunwaree. Lemer Quatre Bornes, Mr. Sonoo, ti swet labyinveni, e Vis Premye Minis Xavier Duval, ki osi Minis Turism, ti anonse ki tu problem fam pu rezud kan lindistri turis pu agrandi.

Dr. Poonoosamy ti fer enn diskur koeran lor progre fam, kuma kapav dokimant li atraver Konferans UN siksesiv, e Konvansyon UN siksesiv. Li finn osi koz lor dekolonizasyon, e lor zefor onivo nasyonal pu ede dan emansipasyon fam. Lindsey Collen ti dir ki *Muvman Liberasyon Fam* ki li reprezante ena enn vizyon kritik lor “*gender strategy*” antan ki gid pu muvman fam. So diskur ti an 2 seksyon: li finn kritik limitasyon e mem danze “gender strategy” ki riske ranforsi patriarsi, e lerala li finn pran enn sel lexanp kot sa 2 vizyon diverzan opere.

Ala, so bann not pu so diskur:

Diskur Lindsey Collen

Dabor, mo felisit GEA pu so linsiyativ organiz enn deba piblik, e mo felisit dimunn prezan ki finn dedye zot Samdi gramatin pu vinn partisip dan enn deba lor sa tem la. Kumsa ki pu gayn progre pu fam: par reflesi avan nu azir politikman. Ena 2 apros byin diferan lor keston fam dan sosyete. Ena 2 lekol de panse. Ena 2 kalite program pu sanzman pu fam.

Ena 2 kalite lorganizasyon fam.

Ena enn kuran, ki finn vinn for dan dernye 15-20 an (e ki ti tultan byin feb avan sa) ki so bimm se rod fer fam monte *dan yerarsi patriarkal*, fer fam rant dan pozisyon puvwar dan sosyete aktyel, e fer fam pran desizyon parey kuma zom ki a-la-tet sosyete, pran desizyon. Sa paret enn fraz difisil kan mo dir sa kuran la viz pu fer fam monte dan “*yerarsi patriarkal*”. Me, li simp.

Li ule dir zot truv lalit fam kuma enn lalit pu sak fam rod grinpe, grinp lesel sosyal, alinteryer sa striktir patriarsi – kot zom pwisan ki reyne, kot zom ki ena monopol lor desizyon. Zot bi se pu partaz sa monopol lor puvwar pran desizyon la. E tit sa forum la, li tom kareman dan lozik sa kuran la: Eski fam pe gayn puvwar, pe monte sifizaman, pu kapav pran desizyon, e li suzantand ki li dan kad sosyete patriarkal egzistan.

Sa mo, sa term, “jennder”, ki anfet dan muvman fam suvan nu apel “jennder-jennder” parski nu pa konpran ditu plas sa mo la dan muvman fam, li enn term ki pa sorti dan lalit fam ditu. Li sorti, kuma enn stratezi, otan ki nu kapav sern li – depi FMI ek Labank Mondyal, e finn adopte par Nasyon Zini, e so bann instans kuma CEDAW, lerala bann organizasyon rezyonal kuma SADC. E, li vre ki sa stratezi la, li ede, li pozitif mem, dan sa bann pei kot telman ena opresyon fam ki u pa gayn drwa servi mo kuma “emansipasyon” ek “liberasyon” ditu, alor stratezi ki viz emansipasyon ek liberasyon li byin difisil – mo pe koz lor Larabi Seodit, par exanp, ubyin sertin pei dan

Lafrik, kuma alepok Uganda, kot u ti gayn pinisyon sosyal, parfwa mem legal, kan u rod atak sosyete patriarkal, limem. Alor, dan ka sa bann pei la, sa stratezi Nasyon Zini, li ti pli bon ki naryin ditu. Me, li enn rekil terib, kot deza nu fini al pli lwin dan nu panse e dan nu aksyon, e kot nu deza ena enn stratezi buku pli vizyoner.

Dan Moris, kuma dan buku pei, li pa ditu enn tabu pu nu rod nu emansipason. Fam pa zis gayn drwa lite, me finn lite. E sa amenn nu, anmemtan pu koz lor 2yem kuran dan muvman fam, dan lekol mwa mo ete, e lasosyasyon kot mo manb, Muvman Liberason Fam ete. Li swiv enn long tradisyon lalit kont patriarsi. Pa zis sa dernye 15-20 an. Onivo mondyal li al omwin 200 banane avan dan Lerop (depi Mary Shelley a Frederick Engels), dan Lamerik, e dan Moris, depi bann lane ’40, setadir 75 an, kot bann fam ti pe deza rod “emansipasyon”, lite ansam pu emansipasyon, e pa zis sa “gender equality” limitatif la.

Emansipasyon

Emansipasyon ti ule dir, e tuzur ule dir, libere depi enn sistem ki dominn fam. Emansipasyon ti ule dir, e tuzur ule dir, emansipe depi patriarsi. Li ule dir sanz striktir inegal sosyete. Dan Moris, ti ena tu kalite le-ne pu nu: Mme Boyer de la Giroday, Mme. Ursule Ramdenee, Mme. Ramdoyal dan Family Planning, Mme Mansoor, Shakuntala Hawoldar, e Mme Deepchand, e onivo sak kartye ti ena bann fam dan lasosasyon de dam – non-kominal, pu konn lir-ekrir pu gayn drwa de vot, pu ledikasyon

e lalit politik. Tu sa bann fam dan muvman fam Moris ti pe rod *emansipasyon an zeneral*. Zot ti pe milite pu dilo, kont kolonizasyon, pu akse a later, pu foraz pu vas, pu egalite ant tu dimunn dan sosyete, u o-mwin pu enn minimem pu lamas fam. Tu ti pe rod sanz sosyete, *sanz striktir sosyete*. Pa ti ena okenn bi pu fam zis monte dan pozisyon puvwar kot pran desizyon, non.

Liberasyon

E apre sa, apartir bann lane '70, sa lalit la finn aksantye. Miting piblik Zardin Konpayni, lamars, manifestasyon, petisyon forum. Li finn vinn enn lalit pu emansipasyon *e osi liberasyon*. Liberasyon, li ena plizir laspe: sanz sosyete pu ki nepli ena otan inegalite *an zeneral*, valoriz tu rol fam deza ranpli anmemtan – ki kapav paret enn kontradiksyon – e nu bi se pu *defye bann yerarsi* par enn bi pu ranplas sa bann yerarsi ki monopoliz pran desizyon, e met dibut enn nuvo sistem, kopere antan ki egal, rod enn meyer sosyete pu tu dimunn atraver enn meyer sosyete pu fam. E, li pa sipaki lide dan vag. Fam nu deza viv dan enn parti nu lavi, dan sa koperasyon la, andeor sa patriarsi la. Nu deza partaz reset, san fer dimunn peye. Nu okip nu zanfan, ek zanfan nu vwazin, kan zot malad. Nu partaz konesans. Nu pa priv enn zanfan so repa aköz li pares. Nu egaliter. Nu sant enn fwaye. Sa, li enn striktir plat, egaliter. Pa enn yerarsi, pa enn lesel sosyal.

E, emansipasyon ek liberasyon fam ena buku zafer an-komin: me, sirtu zot challenz patriarsi, zot ule debaras sa kalite yerarsi kot enn misye, sirtu enn gran frer, li enn sef klan: lerla ena so 2yem frer, lerla 3yem: e sakenn so premye garson pli for, e so. Li enn yerarsi ki dominn laplipar zom, pa zis fam. Li karakterize par inegalite.

E sa striktir la ki nu ule challennj. Li kan dimunn pa truv patriarsi, ki zot pa konpran.

Sosyete Patriarkal

Si nu get sosyete patriarkal, nu oblize rekonet ki li enn piramid: Bann gran misye ki kontrol bann imans konpayni prive lao – avek 5,000 dimunn pe travay pu zot. E pu kontrol zot ena enn trale manejer, ti-manejer, gran supervayzer, ti-sef, ziska mus patron. E lerla enn gran nomb travayer – dan enn lizinn, dan enn gran biro saybersiti, dan enn gran biro lasirans sipa Labank, dan karo. Seki lao, preske tultan zom, li dominn zom-fam, tulde. E sa 2-3 zom dominer (anfet petet mil zom, de mil zom, dan ka Moris) alatet patriarsi la, laplipar zot misye-mem, me sa pa fer enn gran diferans, zot kontrol 3/4 later Moris, zot kontrol 3/4 kapital Moris, zot kontrol tu gran labank, lotel, lizinn, tablisman, e suvan, me pa tultan, zot reysi dikte tu parti politik dan Parlman. Kote Leta, ena enn seri institisyon yerarsik – piramid mem. Kuma servis sivil. Ena so PS, so PAS, so trale su-sef, sakenn byin limite, kaze dan enn ti-bwar. Grander so biro, grander so des, grander so loto, grander so lapey pu manze so zanfan, tu depann lor zot ran. Samem patriarsi la.

E, par exelans, sosyete patriarkal, li reprezante par sekter lapolis: Enn Komiser Lapolis, enn sertin nomb ACP, ankor plis Sirintandan, Asistan Sirintandan, lerla bann Inspekter, bann serzan, bann kaporal, e par milye, sipa 6 a10 mil sinp gard. Parey kote sef prizon. So komiser, so bann asistan, so bann sirintandan vini mem, ziska par milye sinp gard shyum.

Revandikasyon

Kan nu konpran “patriarsi” e so bann “yerarsi”, sa bann piramid la, e nu kone ki sa sistem patriarkal ki pe dominn nu, lerla sa afekte ki revandikasyon, *kidemand* presi, nu, dan muvman fam, nu met divan. Ki revandikasyon pu ranforsi nu lalit, afebli reyn patriarkal? Ki revandikasyon, mem li par

erer, li pu afebli nu lalit, e anfet ranforsi seki pe oprim nu?

Mo prefer donn enn sel lexanp an detay pu eklersi diferans ant stratezi jennder-jennder ek stratezi pu emansipasyon liberasyon, aköz sinon letan pu fer defo: kestyon vyol.

Vyol:

Ki demand nu met par divan, ki revandikasyon, ki pu fer progre pu sosyete lor kestyon vyol?

-- Tandans jennder-jennder, li pu revandik:

(i) Enn fam polisye dan stasyon 24/7. Lerla fam kapav al stasyon avek mwins lafreyer, parsi ena enn fam.

(ii) Bizin otan ACP fam ki zom. Otan Sirintandan fam ki zom, etc dan lafors polisyer.

(iii) Bizin ferm bann misye vyoler pu 20 an, 30 an, 40 an, swa pandi zot, swa kup zot grenn fizikman ubyin par medikaman.

Lefe sa demand la, li ranforsi patriarsi, li pa afebli li. Li anfet fer ditor. Les mwa explike kifer. Nu get sa bann pwin la enn par enn:

(i) Dabor, si guvernman tutswit anvi fam polisye dan sak istasyon 24/7, li pu bizin rekrit buku plis polisye, grandi lafors polisyer. Me, sa pu *ranforsi* sosyete patriarkal. Nu fini truve ki sa yerarsi polisye, li enn form patriarsi par exelans. Polisye dan CID par exanp, zot maltret prizonye dan selil, bate, zure, torture, mem tuye. Li parey kuma zom bat fam – 4 miray kasyet li, e tradisyonelman viktin la ki sosyete krwar bizin res trankil, bizin onte. Travay ki lapolis fer dan kartye, li ti pu pli byin fer, e suvan li deza pli byin fer, par bann belser, vwazinn – setadir aret lager inital, etc. Apar sa, lapolis pas tu zot letan gardyin sa inegalite sosyal. Kot ena enn nuvo Lotel, tutswit met enn nuvo istasyon. Kot enn nuvo lizinn, enn nuvo istasyon. Alor, si u dimann enn sosyete avek plis polisye, u pe fer fos rut. U pe ranforsi patriarsi ki anfet u

lennmi mortel.

(ii) Si ena buku sef ki pran desizyon dan lafors polisyer ki fam, eski sa pu ede? Sa finn deza ena lexperyans reyel, e li finn ena lefe kontrer. Mo pu montre lexperyans pli orib, pli notwar dan lemond. Pandan lager ilegal, kot US ek UK finn atak Irak an 2004, ant-ot, zot finn pran buku zennom prizonye. Enn parmi bann prizon ti vinn notwar, Abu Graib. Kifer? Akoz ti ena konportman patriarkal, zom macho, pli kriyel ki finn deza kone. E sa finn vinn piblik, akoz ena gard prizon ek polisye ki ti telman fyer de zot, ki zot finn filme. Anu gete kisann la ti ansarz tu prizon dan Irak pu USA. Zeneral Janis Karpinsky. Enn fam. Ansarz intelizans deryer arestasyon, e pros ar torit, Barbara Fast. Ansarz tu seki pase dan Irak su lokipasyon: Condoleeza Rice. Setadir 3 fam, ot, dan pozisyon pran desizyon, finn pran bann mem desizyon patriarkal, ki zom. Petet pir! Parski zot ena pu pruve ki zot mari macho. Li orib. Se saki arive kan buku fam vinn sipa Komiser Lapolis sipa prizon. Dayer, dan Abu Grayib, parmi 7 perpetrater ki ti anfet tortir e abiz sexyelman bann deteni Irakyin, ti ena 3 gard fam.

(iii) Bizin pini bann misye ki vyole par tu kalite mwayin drakonyin. Sa osi li enn revandikasyon kareman in apropiye ek kont-produktif. Li inapropriye, parski nu kone ki laplipar ka vyol *zame raporte*, mem pa *koze* an piblik. 9 lor 10, ubyin 99 lor 100. Pu buku rezon. Alor, nu bizin sanz bann zafer pu *anpes* sa kantite vyol ek abi sexyel. Pa zis viz pu pini exsesivman sa enn-enn ki trape.

Dan bann ka vyol, kuma tu dimunn isi prezan ki dan muvman fam kone, 9 lor 10 vyoler li pa sipaki inkoni. Li enn pros ar viktim la. Tonton, boper, frer, kuzin, granper, papa, boyfrenn, e plis ki tu: mari. Swa li enn dimunn ki ale-vini dan lakaz kot viktim la. Alor, li enpe



Desin lanatir, Nicaragua

ridikil pu krwar ki nu kapav ferm tu sa bann zom la.

Pu sa enn-enn vyoler ki vyole kan li pe exekit enn vol, sipa kan enn lokazyon prezante, la osi, eski li pu sorti dan prizon pli bon dimunn, ubyin pli vyolan, pli amer? Eski li pa pu vinn plis enn pilye patriarsi, enn menas pu tu fam?

E, sa amenn nu ziska ki revandikasyon, ki demand, nu dan MLF, dan nu kuran anfaver emansipasyon ek liberasyon met divan. Nu lalist demand li totalman diferan. Nu pa dimann plis polisye. Zame de nu lavi. Nu pa dimann fam gayn promosyon alinteryer bann striktir patriarkal. Sa li pa enn atak kont patriarki, li plito swa enn perdi letan, gaspiyaz larzan, swa li kareman ranforsi patriarsi. Anpasan, li kree fos ilizyon ki pe “fer kiksoz”. E nu pa dimann pinisyon brital kont perpetrater, nonpli. Nu ena 2-3 demand sinp:

(i) Nu revandik, e nu finn anfet gayn viktwar lor la, me dimunn pa kone: ki enn fam ki sibir enn vyol ubyin enn agresyon sexyel, li pa bizin al istasyon ditu. Li pa bizin al prezante dan sa sant patriarsi ditu. Sa nu revandikasyon. E deza li kumsa. Eski U ti kone? [Lindsey finn dimann lasistans, ek enn-sinkyem finn lev lame –

sirtu bann aktivist dan muvman fam.]

Kot u kapav ale anplas al istasyon? Abe, u viktim enn agresyon: u al direk nerport ant 5 gran lopital, ek lopital Rodrig. Laba fini organize, gras-a nu revandikasyon, pu ki vit-vit met dibut enn Yunit espesyal pu okip fam (Crisis Unit):

- premye okip nu fizikman, pu duler, seynman, infeksyon ki kapav gayne, maladi veneryenn ki kapav trape, groses potansyel.

- dezyem, sipor sikolozik depi lopital.

- trwazyem, *si viktim la ule*, enn fam polisye vinn pran so steytmennt dan lopital, dan plas swin, pa dan enn lye patriarsi debride kuma istasyon.

(ii) Nu revandik ki dimunn *denons* ka vyol dan lasosyete, si li raport li lapolis ubyin non. Nu dir, rakont u ser, dir u kamarad, dir enn dimunn pros. Averti lezot fam. Fer dimunn kone ki u finn pase – osi vit ki posib apre sa trauma la. Diskit li. Pran desizyon ansam, si enn ka lapolis, enn ka lakur apropiye, si li pu itil ubyin non dan sa ka partikilye la, si li pu avans sosyete ek viktim la, ubyin non. Me, fer dimunn kone.

(iii) Nu revandik tu dimunn tulezur denons tu sa zom ki abiz fam tulezur, ki sa abi la li verbal, fizik, ubyin dan nerport ki fason.

Anu fer li vinn enn zafer *napa fer*. Nu denons so zure, so sikane, so trape, so vyole an piblik. Li bizin vinn *inakseptab*. Se tu. Kifer nu bizin fer enn bann zom CID rant ladan asak fwa? Nu ki bizin fer ki dimunn koz sa, anpes sa.

(iv) Sirtu, nu revandik ki fam gayn ase lafors (sosyal, ekonomik, politik, ek mem fizik) pu defann nu kont menas vyol. Sa inplik lapey stab ek rezonab, li inplik lozman stab ek rezonab, li inplik puvwar pran laparol an piblik, li inplik lesson dan self-defenns).

Deba otur mo roman, *The Rape of Sita*, ti reyelman premye fwa dimunn ki koz vyol an piblik. Sandra O'Reilly kan li finn denons so 2 vyol an-band an seri, lor radyo, finn kontiyn sa prosesis la. So kuraz finn fer dimunn koz vyol. Nu tu bizin ankuraz dimunn koze: ar kamarad, ar fam dan fami, ar sikolog, ar lezot fam dan muvman fam. Se sa ki inportan. E fer izol zom ki fer fezer.

Ala, diferans ant 2 laliyn:

- Enn ki rod fer fam monte dan pozisyon puvwar, pran desizyon dan kad sosyete existan, alinteryer yerarsi patriarkal – e li konfond sa avek lalit fam.

- Ek dezyem laliyn, ki samem ki bizin, e li buku pli difisil, se regroup fam ansam, dan bann ti-lasosyasyon, pu ki nu ansam nu gete kimanyer vir sa bann yerarsi patriarkal ki dominn nu pa anba lao – me an kiksoz pli plat. Kiksoz ki defann lor koperasyon, egalite, lasosyasyon.

E mo ti pu kontan terminn lor enn zafer lor “natir imin”, ki suvan servi pu zistifye inegalite, e pu zistifye sa inegalite dan piramid patriarkal.

Imin finn anfet viv plis ki 200,000 banane san okenn yerarsi, ni okenn patriarsi. Syans asterla kone: paleontoloji, antropoloji, listwar, bann sistem pu alwe enn dat a diferan lezo ek diferan zuti ranze (carbon dating, ek radio-active dating), finn fer

nu realize, ki sa inegalite, sa sosyete anform enn seri piramid la, sa dominasyon fam la, li ena forse-forse 5,000 banane dan enn-de plas dan lemond.

Avan sa pandan tutlong sa lot 200,000 banane, nu ti viv dan enn koperasyon. Sa nu natir sa. E lalit fam se dan lepok modern, avek tu sa prodiksyon pu ki ena “plenty”, ki nu servi sa lorganizasyon sosyal ki pli reflet

nu natir dan lonterm. Sinon, ena tu kalite danze divan sosyete: lanvironnman, klima, tu pe rwine, tu resurs pe piye, e lager pe deklare – san ki nu, lamas imin lor later, pe futi kontrol seki lao sa piramid la, e ki pe pran desizyon.

[Apre diskur Lindsey ti ena enn ertan deba lor tu bann tem sulve, sirtu lor stratezi lor vyol.]

KWIN LASANTE

Ki ete kanser?

Kan nu pe koz “kanser”, ki nu pe ule dir? Dan nu lekor nu ena plizyer selil lor lakel nu lekor ena enn kontrol lor so divizyon ek so devlopman. Dan ka kot lekor perdi kontrol lor divizyon ek devlopman bann selil, sa bann selil la kontiyn divize san limit. Dan sa ka la nu gayn devlopman kanser.

Ena ancor resers ki pe fer lor insidans kanser, eski manyer dimunn manze ek travay li fer ena lyin avek maladi kanser. Zordi ena plis depistaz avan kanser dezenere e bann metod pu detekte e dyagnostik enn kanser inn buku amelyore, par exanp, ena skann, tes laboratwar, teknik prelevman depi groser, mamografi, papsmear, e lezot ancor.

Ki bann faktor ki responsab pu kanser?

Premyerman nu pena enn faktor spesifik ki nu kapav 100% sir ki koz sa maladi la, alor ena plizyer faktor ki ogmant nu risk pu gayn kanser.

1. Ena faktor zenetik, kan dan famiy ti deza ena, risk pu gayn sertin kanser deza la pu zenerasyon apre, mem kantite prekasyon dimunn pran dan lavi.

2. Ena risk ki ogmante kan dimunn expoze avek prodwi kuma lamiant, lafime, Reyon X.

3. Lezot risk vinn depi infeksiyon koze ar viris ek mikrob, ubiyn mod alimantasyon dimunn.

Ki Tretman kont kanser?

Premyerman tretman kanser li enn de bann tretman ki long, e tretman la disponib dan tu bann lopital dan Moris apar ena tretman spesifik ki fer dan lopital Candos.

Kanser kapav trete par enn ubiyn plizyer fason depandan tip kanser. Ena tretman par loperasyon, simyo terapi (medikaman a traver lavenn), radyasyon (sofe dapre dozaz), ormonn terapi ek tretman spesifik kont resepter spesifik.

Ena dimunn avek enn kanser so probabilitate gerizon depandan lor ki tip kanser, ki staz, ki lezot komplikasyon medikal li ena, so laz, so kondisyon zeneral ki permet gayn enn tretman u non e pu determinn rezilta so tretman.

Avan kanser ti fer per parski nu pa ti konn buku zafer lor maladi lamem, me aster ena buku resers inn fer kot nu konesans lor maladi lamem e opsyon tretman inn ogmante, e zordi buku malad ki ena kanser, reysi, avek tretman, viv enn lavi plizumwin normal.

MD & SJ

LPT lans “The Book Lover”

Ena nuvo lespas kiltirel finn uver.
LPT finn lans The Book Lover, enn labutik liv
Rut Rwayal, GRNW.
Buku dimunn pe al aste liv,
an Kreol, e osi liv segonn-min an Angle Franse,
dan pri extraordinier.
Li fini vinn enn plas rankont.

Vandredi 23 Oktob, *Ledikasyon pu Travayer* finn lans enn nuvo libreri, *The Book Lover*. Sa nuvo libreri la finn ranplas *Labutik Liv* ki ti detrir dan gran inondasyon Mars 2013. Depi lerla, *Labutik Liv* finn kontiyn egziste avek enn stok limite, me ki ti pe agrandi pli ale. Ena sirtu liv, magazinn ek lezot piblikasyon an kreol. Parkont, *The Book Lover*, li tuzur ena liv an Kreol, me anplis, li ena enn gran stok liv segonnme, an Lang Angle ek Franse.

Donasyon liv

The Book Lover finn vinn posib gras-a donasyon liv depi plizyer individi ki finn byin zenere pu ofer LPT liv interesan an Angle ek Franse. Pri bann liv finn klasifye an 5 kategori, depandan zot grander; Rs200, Rs100, Rs50, Rs25 ek Rs10.

Ena plizyer dimunn ki finn promet pu fer donasyon liv a LPT pu asire ki tultan ena enn stok. ‘*The Book Lover*’ pe kontribiye pu develop ek ankuraz kiltir lir dan Moris e dimunn ki finn fini aste liv ena swa pu return liv la kan fini lir li an esanz pu enn lot liv pu lamwatye pri.

Zur Lansman

Lansman ti fer dan kontex Zurne Mondyal Langaz Kreol e tem ki LPT ti swazir ti “*Devlopman multilinguism ot-nivo baze lor langaz maternel ot-nivo*”.

Ti ena anviron 60 dimunn, zelev kur lir-ekrir, manb LALIT, akademisyin, etidyan ek bann amure liv ti prezan pu lansman. Alain Ah Vee ki ti fer diskur introdiksyon, finn koz travay ki LPT finn fer lor letan pu

abuti a nesans *The Book Lover*. Diskur lansman finn fer par enn lekcherer Liniversite Moris, Guilhem Florigny ki finn byin tuse ar travay ki deza finn fer pu rekonesans langaz Kreol.

Pu sa seremoni lansman ti ena osi resitasyon poem ek lektir extre liv par Pascal Nadal, Ashish Beesoondoyal, Anne-

Marie Hypolite, Vijay Naraidoo ek Alain Fanchon. Kisna Kistnasamy finn koz lor lide lansman enn *klib lektir*, e finn fer enn lapel a tu seki interese pu kontakte li. (Si ena lektir Revi LALIT interese, kontakte Kisna.)

RK

Bhagwan, Subron ek Governman Lepep pu “Sov Lindistri Sikriyer”

Dirizan MMM Rajesh Bhagwan finn fer lapel a governman pu inklir lider sindikal kuma Subron dan enn lelan pu sov lindistri sikriyer. Ala seki depite Bhagwan finn deklare dan Lasanble le 9 Avril 2015 dan kad deba lor diskur bidze Minis Vishnu Lutchmeenaraidoo (Source Hansard):

“Madam Speaker, yesterday, we had a PNQ on the sugar industry and we all know that *la survie même de l’industrie sucrière est menacée*. The hon. Minister has given replies to us, we are satisfied with them, but we see that this very important industry is in danger and the hon. Leader of the Opposition made a request to the hon. Minister to have a Master Plan and to see to it that there are new incentives, there are new avenues to redevelop, to save that industry.

“This morning, I was listening to one of the trade unionists, Mr. Ashok Subron, who was appealing to the hon. Minister concerning one particular report and if we want to succeed in that reorganisation process which started back in 2002/2003 when hon. Jugnauth was Minister of Agriculture, we will need to have everybody on board, not only the owners of the factories, but even we, parliamentarians, we will have to give a helping hand because it concerns the survival of the main industry which has been there for such a long time. So, I appeal to the hon. Minister, at least, to hear the voice of the trade unionists, not only Mr Ashok Subron, who is a trade unionist, but also others who are also very keen to give their support to the Ministry and the Government in order to save this very important industry.”

Enn lalyans malsin ki nu truve expoze isi, li explik an-parti sa persistans patrona ek Leta Moris pu anfonse dan enn lindistri ki pe degradingole. Pa zis li pe degradingole, me li gurma tu later agrikol, li pa donn anplwa, e li pa mem kontribiye dan tax. Sa persistans aveg la, li prodir insekirite alimanter kuma so premye rezilta.

KWIN LAR
Nuvo Galri
dan Porlwi
ICAIO

Pu premye fwa Moris, ena
expozyon ki dire 3 mwa.
Pu premye fwa ena galri ki
pa pe zis viz vann tablo.
Kozri, workshop, agogo.

*Institute for Contemporary Art
Indian Ocean (ICAIO) ki finn
met dibut par Salim Currimjee
pu promuvwar ledikasyon lor
lar finn terminn so dezyem
expozyon, Material Matters:
New Art From Africa.*

Atraver plizir aktivite otur sa
expo la, ICAIO inn reysi amenn
publik ansam otur expozyon
pu partaz lide lor kreasyon ki
ti expoze. Dabor ti ena enn
premye kozri Lindsey Collen
dan MGI. Divan enn lasal byin
ranpli, li finn analiz dan enn
fason byin detaye sak tablo,
foto ek instalasyon expoze, e
osi travay minisyè ki kirater sa
expo la, Sally Coucaud, finn fer
pu amenaz sa expo la. Li finn
atir latansyon lor linportans
bann tem aborde, osi byin ki
materyo servi par sak artis, pu li
exprim so lide. Lindsey finn fer
enn 2yem kozri dan kad Galri
ICAIO ki truv Lari Desforjes,
Port Louis. Finn ena osi lezot
rankont ant responsab ICAIO ek
etidyan Fine Arts MGI.

Me evennman ki kitfwa finn
pli raprose ar lobzektif ICAIO se
vizit bann grup adilt ek zanfan.
Par exanp, enn grup zelev kur
literesi LPT ti fer enn tel vizit
Mardi 17 Novam. Li ti premye
fwa ki zot vizit enn galri lar. Dan
kur enn semenn apre zot finn
partaz zot linpresyon lor seki zot
finn truve ek dekuver. Ala zot
pwin de vi ki finn kristalize dan
enn poem ki enn zot profeser
Lindsey Collen finn met ansam
(get akote.).

Nu premye vizit enn galri lar

Premye fwa mo'nn ale.
Mo pa ti kone ki li ete, sa galri
lar la.

Mo'nn deza pase la,
Mo pa ti pran li kont.

Kan mo rantre mo truv enn
bolom an goni –

So lizye andan,
Lakord otur so liku,
Enn latet, lakord otur so liku.

Ena enn buro deryer li,
Avek enn kikenn,
Eski li pu al met li pandi?

Li osi?

Bolom an goni deza ena lakord
otur so liku.

Kan mo ti rantre,
Mo ti krwar li enn mize fer per.
Sa galri lar la.

Lerla mo'nn gete partu
Mo'nn truve.
Mo'nn reflesi.

Premye fwa mo'nn ale.
Dan enn galri lar.
La,
Mo'nn admir li byin.

We.
Ena enn tablo lekritir anbalao,
Anbalao.
Kumadir tras disan.
Li pe dir lemond anbalao.

Ena enn stati blan,
Enn stati blan fer ar polistirenn?
Bizin lespri-mem
Pu fer sa,
Pu skilpte sa.
Pa sima sa?
Pakejing sa.
Pa fasil sa,
Enn stati blan fer ar polistirenn.

Karotsu la, anba, fer nu reflesi,
Ki li ete?
Mo reflesi, mo truv
Enn dimunn pe ale, ale, li tom
malad,
Lerla li enpe byin,
Li malad ankor, li anpire,
Sa eklate.

We. Sa karotsu la.
Li vinn enn fler nwar, sa karotsu
la.

Enn dra inn brode alamin.

We. Enn tapi, brode ondire
lontan, lor la.

Brode alamin.
Enn lot ena lalenn.

Mo'nn truv seve vas lor enn
tablo lapintir maron,
Seve vas, kuler nwar.
Seve vas.

Enn lot stati kuler blan, mo'nn
truve.

Ar lapo bef. Lapo bef.
Ek so sabo.

Li form enn dimunn,
Enn stati kuler blan,
Enn stati san latet, san lame.
San latet, san lame?
Kifer sa?

Sa madam ki pe asize, asize
anba la,
Kifer sa?

Li fatige.
Pena transpor.
Ena enn tristes lor so figir.

Li fatige.
Li pe reflesi,
Enn toksikomann?
Posib.
Enn travesti?
Posib.
Li fatige. Fatige. Tris.

Mo'nn reflesi lor sa kivet emaye
la.

Enn fam li'nn met enn goni
parter,
Li'nn met so kivet emaye lor li,
Li pe dekras so linz ar savon
avek so lame.

Avek so lame.
Li pena linz lor li.
Li'nn met so kivet emaye,
Li pe lav li ladan.
Kuma lesklavaz.

Premye fwa mo'nn ale.
Mo pa ti kone ki li ete, sa galri
lar la.
Mo'nn deza pase la, mo pa ti
pran li kont.
Mo pa ti pran li kont.

Poem dekuver par Lindsey Collen 2015 apre
vizit zelev literesi ar AMJ, DL dan expozyon
Material Matters: New Art from Africa,
ICAIO, Port Louis

O.N.G. KI FER DITOR?

Li paret enn zafer ase etonan pu nu dir:
ki lorganizayson ki dir ki zot “saritab” pe fer ditor.

Me, li vre.

Li enn nuvo fenomenn byin inportan.

Depi inpe letan, o-mwin depi 1996, LALIT finn pran traka lor *ditor* ki buku ONG, finanse par sekter prive ek Leta, pe fer.

Fenomenn mondyal

Anfet, ONG ki depandan lor sa kalite finansman extern la, zot fer ditor pa zis Moris. Zot plito enn fenomenn mondyal. E li pa tro nuvo. Ver lafin 19yem Syek, e avan Premye Ger Mondyal, ti ena enn ta sosyete ONG ki ti pe fer buku ditor, e finalman zot ti diskredite. (Get roman apel *The Ragged Trousered Philanthropist* par Robert Tressell an 1910.) Lerla pandan preske 100-an, sa kalite travay saritab la ti ena enn move repitasyon, ki li merite. Me, dan dernye 20-an, avek sa nuvo neo-liberalism galupant, li finn returne. Partu dan lemond.

Greenpeace

Tu denyeman Greenpeace, enn lorganizasyon ki ti ena enn gran repitasyon kuma enn ONG ki protez lanvironnman, finn expoze atraver Kab Wikileaks kuma enn espes frod. Leta Britanik ti met dibut enn pyez pu lorganizasyon lanvironnman, setadir enn sipoze Park Marin (“Marine Protected Area”) otur Chagos. Me, so sel bi sete pu anpes Chagosyin return dan zot Lil ki form parti Moris. Plan la finn dekrete ilegal par Tribinal Konvansyon lor Lamer (UNCLOS). Me, seki finn diskredit bann Greenpeace se pa zis zot finn tom dan pyez, kuma bann zanfan – e sa malgre explikasyon lisid ki LALIT ti avoy zot par emel – me zot finn dakor pu innyor lefet ki ena enn gran, gran poliye laba: enn baz

militer nikleer lor Diego Garcia. Sa kalite konplezans finn rwinn zot repitasyon.

Eco-Sud

Pli pre ar nu, ena Eco-Sud, enn ONG ki protez lanvironnman, li osi. Lor so prop websayt, li flat limem kumkwa li gayn finansman depi bann gran gran lotel ki deza polye samem put Blue Bay ki zot dir zot pe lite pu proteze.

Greenpeace ti manipile par laparey deta UK. Eco-Sud par kapitalist ki ena enn lintere ekonomik dan anpes nuvo lotel met kompetisyon ar zot.

Lasosyasyon ki fer profi

Anmemtan, ena par santenn lasosyasyon fam Moris, ki pandan dernye 15 an par la, finn gayn lankurazman Guvernman pu pran lonn ar Labank, e konverti zot lasosyasyon ki ti pe milite pu emansipasyon fam dan enn ubyin plizir lantrepriz ki fer profi lor ledo lezot fam. Tayming ti inportan. Zis kan Labank ti ena tro buku larzan likid, ti mank dimunn pu pran lonn. Asterla, nu truve ki buku lasosyasyon fam nepli pe vreman lite pu emansipasyon fam, me pe konverti fam an ti-patron, ki dominn ek explwat lezot fam, antan ki anlwaye.

Finansman sindika

Buku sindika ek federason finn gradyelman finanse par bann Trust Lerop ek USA, e zot azut dan rwinn digit demokrasi intern ki ti existe dan sindika. Asterla, Leta, li osi, li finans federasyon atraver TUTF. Sa osi riske lindepandans ladireksyon sindika. Purtan, tradisyonelman lafors enn sindika se so

lindepandans kote finans.

Leta lav so lame ar so rol sosyal

Leta, amizir li finn lav so lame ar lamizer, ar orfelin, ar dimunn ki pe sufer maladi infeksye, mem ar reinsersyon prizonye dan lavi ordiner, samem Leta la finn finans enn eskadron ONG. Li donn zot ase liberte daksyon, me li kontrol zot *anfend-kont*, e kan li gayn kritik, Leta la, lerla li dir, kuma Minis Gayan inn dir, ONG ki pe fane.

Enn lafors pu sanzman konpromi

Alor, bann lasosyasyon ki finn regroup lamas dimunn pandan enn syek, e ki finn ede pu sanz lemond, finn karyate par patrona, enn kote, ek leta burzwa, lot kote.

Purtan, sosyete imin oblize sanze.

Sanzman irzan nesaser

Kifer nu dir sa? Rezon finn vinn irzan. Nu bizin, par exanp, anpes limanite fer limem vinn extink, anpes li exterminn tu seki vivan lor later e dan lamer. Tulezur, ena desizyon pe pran par bann Leta ek bann gran gran bizness ki pe fer bul later koste ar enn seri “pwin baskile” (“*tipping points*”) dan lanvironnman. Wi, lanze byin ot. Ris pe vinn pli ris. Pov pli pov. Kimanyer nu kapav zis dedye nu pu “ed bann pov”, sanki nu ena lame lib pu challennj tu sa bann proses prand desizyon ki pe fer dimunn vinn pli pov tulezur?

Wi, lanze byin ot. Ena lager, lokipasyon militer, bombardman tulezur dan pei kuma Afghanistan, Iraq, Syria, Libya.

Anmemtan, leta kuma US, UK ek Lafrans arm e finans tu kalite “rebel”. Sa dub politik, kuma 2 pins enn krab, finn al deklans enn seri kriz migrasyon osi byin ki atak terorist, enn apre lot. Bann leta pran desizyon pu al bombard lezot pei. Zot fer li lor baz enn tisi mansonz, kuma Blair fini admet pu pli gran lager, setadir kont Irak.

Rekolonizasyon par Smart Cities

Wi, lanze byin ot. Pei kuma Moris pe re-kolonize par “Smart Cities”, later agrikol pe betone, lamer pe rwine, par enn lindistri turist debride, gurma, aveg. Kapital finansye, seksyon kapital pli iresponsab ki tu form kalital, pli fasist ki tu, finn pran kontrol. Li finn pran kontrol, e li dominn mem kapital agrikol ek indistriyel.

Pu sanz sosyete, nu bizin viz pu sanz proses pran desizyon, enn sistem ki aktyelman pe fer ankastre dan enn sistem ekonomik kapitalist.

Sa bann sistem pran desizyon bizin sanze net. Bizin kompletman demokratize. Desizyon ki afekte nu tu pe pran par biznes prive otokrat. Biznes kapitalist, zot pa zis otokratik, me zot bi se expreman pu tir profi lor travay lezot dimunn, tir profi depi dibyin ki an-komin pu nu tu, setadir lanatir. Zot pa bizin mem kontabiliz fre la. Zot reysi, anmemtan, met zot kontrol total lor sa tigit demokrasi ki bann kapitalist finn akord nu, setadir kan sak 5 an nu al vot pu Parلمانter, ki pena puvwar, kan bann seksyon totalman pa demokratik, “lexekitif” ek “zidisyer” ena tu veritab puvwar, e rul tu kuma “fasilitater” pu kapitalist pli kokin lamas dimunn.

Re-met ankestyon Sistem Kapitalist

Sel manyer sanz sa sistem diktater pu pran desizyon, se pu remet ankestyon sa sistem kapitalist avar la. Pu fer sa, nu bizin lorganizasyon.

Nu bizin lasosyasyon. Nu prop lorganizasyon. Nu prop lasosyasyon. Kumsa nu tom dakor lor enn analiz ek enn program an-komin, e lor sa baz la, nu lite ansam pu amenn li.

Lindepandans nesaser

E sel lorganizasyon ki itil, se bann seki net indepandan depi:

- Leta burzwa.
- Finans depi kapitalist, CSR ek lezot finans.
- Grupman relizye ek kominal, ki riske diviz nu.
- Lanbasad pei inperyalist.

Me, selman, tandans la li lekotrer zordi. Buku lasosyasyon ena kuma sel bi asterla pu inpresyon seki finans zot: leta, firm prive, mem lanbasad. Zot bi skilpte pu gayn maximem “likes” depi lazans finansman.

Sinpozyom

Alor, lane prosenn LALIT pu fer enn Sinpozyom lor “Ditor ki fer par ONG depandan lor finans extern, e danze ONG-izasyon lalit pu sanzmen”. Depi lontan, nu pe diskite sa size difisil la. Lerla, dan nu Komite Santral le 9 Novam nu finn pran desizyon

organiz sa sinpozyom la.

Me, li inportan ki nu inform nu deba ki deza anklanse – onivo internasyonal ek lokal.

Ena 4 lartik ki LALIT pe propoze ki dimunn lir:

- 1996: Ram Seegobin so not pu enn diskur li ti fer Lareynion lor *Bambous Health Project*; an partikilye, lor realite sosyal kan li ti met dibut, e realite sosyal totalman diferan 20 an apre.
- 2010-11: Elsa Wiehe lor “Perspectives on Charity Work and CSR”.
- 2014: “The NGO-ization of Resistance” par Arundhati Roy”
- 2015: “The Useful Altruists: How NGOs Serve Capitalism and Imperialism” par Stephanie McMillan ek Vincent Kelley, pibliye dan Counterpunch.

Pu sof-kopi, zis ekrir pu dimann nu (lalitmail@intnet.mu), nu va avoy zot tutswit. E nu dimann tu lektek REVI LALIT fer nu kone kot nu kapav gayn lezot lartik ki u finn lir lor sa size la. Nu dimann u pa zis sirkil tu sa lartik la, me kumans diskite ar kamrad



Desin Goya, *A stormy night*

LALIT RE-MET 2yem LET A OLIVIER BANCOULT: “Klarifye u Pozisyon!”

tuzur.

Kamarad Olivier,

Bann manb LALIT, ansam ek plizyer lezot lorganizasyon, finn implike dan lalit otur Chagos depi preske 40 an: ansam ek GRC nu finn met dibut muvman Rann Nu Diego an 1997, nu finn ena enn delegasyon konzwin pu Fom Sosal Mondyal dan Mumbai an 2004, kot nu finn sey organiz enn bato/flotila pu al Chagos. Alor nu konsidere ki nu an pozisyon pu adres zot sa let uver la zordi.

Ena klerman enn nuvo faz ki pe devlope dan sa long lalit pu drwa de retur e reparasyon, dekolonizasyon e suverennte, e problem baz militer.

Sa batay legal ki GRC finn amene ek buku perseverans paret pe ariv a so limit: zidisyer UK pena presedans lor rezon deta.

Ka ki Repiblik Moris finn gayne divan UNCLOS finn afebli pozisyon UK, e met an keston lexisans BIOT ek so Park Marin.

Tu parti prezan dan Parlman Moris paret pe dakor ki bizin pran enn linsiyativ dan ONU pu amenn enn ka divan ICJ. Dan LALIT, depi lontan sa li nu pozisyon.

Asterla mem, UK ek USA pe negosye pu renuelman sa bay ilegal ki permet baz militer lor Diego.

Divan sa nuvo sityasyon, dan LALIT nu estime ki pu kontinye sa konba pu Chagos, li neser ki enan buku klarte dan nu pozisyon e stratezi: se pu sa rezon la ki nupanse li neser rod repons a enn serten nomb keston.

Nu rekonet ki tu Chagosyen ena drwa a dub nasyonalite; nu rekonet ki drwa de retur e drwa a reparasyon, li pa negosyab.

Eski bann kamarad GRC

LCC\

konsidere ki dekolonizasyon total Moris e so suverennte lor tu so teritwar (dapre Konstitisyon), sa usi li pa negosyab?

Eski GRC pe reklam drwa pu return dan Chagos an tan ki BIOT si UK ofer kondisyon akseptab, ubyen pu return dan Chagos an tan ki enn parti Repiblik Moris?

Zordi lemond antye konsyan ki baz militer lor Diego, li abrit instalasyon nikleer, e sa li kontrer a Trete Pelindaba: eski GRC pu dakor ki nu reklam enn inspeksyon par sa linstans ONU ki responsab pu nikleer? Parey pu bomb a fragmantasyon?

Etan done ki baz militer US lor Diego, li itilize pu bombard bann popilasyon sivil dan peyi Mwayin Oryan, e pu tortir prizonye, eski GRC tuzur pe reklam drwa pu travay lor sa mem baz militer la?

Dan lemond zordi ena par milyon refizye ki pe oblize kit zot peyi, zot lavil e vilaz, al rekumans zot lavi dan lezot peyi. Alor ena problem “imaniter” absoliman efreyan, e li pu byen difisil ralye sutyen pu Chagos pirman lor enn baz “imaniter”. Par kont ena ankor enn gran volonte pu kontinye ek prosesis dekolonizasyon, kuma ena gran muvman pu demilitarizasyon e kont lager.

GRC ena rezon pu insiste ki li parti prenan dan tu negosyasyon e desizyon lor Chagos. Me li neser ki GRC ena pozisyon kler lor enn serten nomb keston, sinon li pu ase fasil pu Britanik e Amerikin explwat tu diverzans e tu mank klarte.

Nu espere ki tu manbb GRC pu reflesi lor sa bann pwin importan, pu ki nu kapav kontinye sa lalit ki nu finn amene ansam depi telman lontan.

Ram Seegobin, Pu LALIT,

25 Oktob 2015

Kopi:

Lapres

V. Hookoomsing

C. Uteem

INFO INFO INFO

Fim Klib

Pu mark 50 an depi masak politik orib dan Indonezi, Fim Klib ti montre fim *The Look of Silence* par Joshua Oppenheimer, 2015.

Prosen Fim Klib pu ena enn fim lor lulu. Li apel “*Wolf Totem*” e li sitye dan Mongoli.

Collection Maurice 2015 deor

Immedia so antoloji anyel tri-leng, Collection Maurice deza avann. Li enn rar prodiksyon literer suteni lor letan, e byin eklektik.

Kur Literesi an konze

LPT so trwa kur literesi an konze apartir mi-Desam. Tu pe rebran an Zanvyé.

Lindsey Collen fer key-note speech Barselonn

Manb LALIT, Lindsey Collen ti al Barselonn pu fer diskur “keynote” dan enn konferans internasyonal lor literatir dan Losean Indyan. Li ti fer dan Liniversite Otonom Barselonn.

Fim Palestinn Lakavern

Swit a Festival Fim Palestinn, finn ena enn seans dan kartye organize par abitan, dan Lakavern, Mardi 7 Desam.

MLF “Focus”

Muvman Liberasyon Fam pu so reynion lafin lane, le 8 Desam finn met lanfaz lor 4 size:

- Nuvo syans lor natir imin avan lagrikiltir, e rol fam ladan (pu get enn but dokimanter BBC).
- ONG ki finanse par CSR, Leta etc, e zot rol nefast.
- Lager Mwayin Oryan
- Lekonomi alternatif.

Atanta dan Paris

Dan LALIT, nu byin trakase kan ena de pwa ek de mezir konsernan linportans lavi imin.

Trazedi lamor 130 dimunn dan Pari, kimanyer li pli inportan ki par milye dimunn ki pe mor akoz bombardman zot lavi depi avyon? Li paret enn resirzans lespri kolonyal.

Vandredi 13 Novam 2015 finn ena enn atanta dan plizyer landrwa dan Paris: 130 dimunn finn mor, plis ki 300 blese. Laplipar sa 8 dimunn ki ti responsab pu sa atanta la finn mor: swa par tir lapolis, swa par fer zot mem eksploze ek bom ki zot ti pe sarye.

Dan bann zur ki finn swiv sa atanta 13 Novam, lapolis ek larme Franse finn fer plis ki 300 landing dan landrwa e apartman kot servis sekre ti panse ena seki zot apel “extremis” ki posibleman implike; finn ena plizyer arestasyon. Dan enn sa landing la, lapolis finn zwenn rezistans arme ek finn ena buku kud fizi ek eksplozyon: lapolis e larme finn tir plis ki 5,000 kut fizi kont sa trwa dimunn dan sa lapartman la.

Serk Visye

Lanket lapolis finn devwal enn koneksyon ek dimunn ki ti baze dan Belzik. Malgre ki laplipar dimunn responsab pu sa atanta la ti ena nasyonallite Franse ubyen Belz, guvernman Franse finn tutswit pwint ledwa Leta Islamik dan Lasiri e Lirak, ek lavyasyon Franse finn kumans bombard seki zot estime bann kan Leta Islamik dan Lasiri.

Medya ek atanta dan lemond

Dan medya Franse e mem internasyonal, atanta Paris finn dekrir kuma enn latak kont “kiltir Franse e sivilizasyon oksidental” par bann “barbar”. Me sa li fer abstraksyon totalman lor lefet ki atanta Paris li swiv enn seri atanta partu dan lemond kot buku plis ki 130 dimunn finn truv lamor: dan Kenya, Madrid, Lond, Mumbai, Tinizi, Pakistan, Lezip (Sinai), e 2 zur avan Paris dan Beirut, e 10 zur apre Paris



Desin Picasso

dan Bamako.

Stratezi erone US ek so alye

Apre atanta “Twin Tower” dan New York, Lamerik finn bombard ek anvayir Afganistan e Lirak, finn asasinn Ben Laden e amenn exekisyon Sadam Hussein: eski sa finn fer disparet Al Quaida, Taliban? Eski sa finn aret atanta kont popilasyon sivil partu dan lemond? Eski lager kont “terrorism” kapav fer depi enn dronn ki pilote par CIA dan enn biro dan Leta Zini e avyon ki bombard popilasyon sivil dan Lirak, Afganistan, Pakistan?

Stratezi invazyon e okipasyon militer Lamerik e so bann alye kuma Grann Bretayn e Lafrans, lokipasyon militer e anexasyon teritwar Palestinn par Izrael, sutyen Lamerik a bann rezim represif kuma Larabi Saudit, se sa kalite stratezi erone ki prepar terin ki permet zenn zom e fam pare pu donn zot lavi pu enn koz dan lekel zot krwar. Zame pa pu kapav aret atanta par dimunn ki pare pu sakrifye zot lavi.

Parey kuma stratezi pirman militarisan pa pu amenn okenn sanzman pozitif, parey stratezi “atanta terorist”, li enn stratezi dezespwar ki provok reprezay mortel kont sa mem popilasyon ki deza pe sibir represyon, ki deza pe peye pu gurmendiz bann marsan zarm, bann marsan petrol.

Tan ki lemond pa pu pare pu

fer fas a veritab rezon kifer otan peyi dan Mwayin Oryan finn demantle, finn detrir, veritab rezon kifer otan dimunn pe mor dan sa bann peyi la, kifer par milyon dimunn pe bizin abandonn zot lakaz, zot lavi e vilaz, zot peyi, tan ki linstin reprezay pu domine lor neseseite refleksyon, pena buku sans ki atanta sanglan kuma Vandredi 13 Novam pa pu kontinye.

RS

Kimanyer ISIS inn Anzandre?

Depi 2015 *Leta Islamik* (IS) aka *Leta Islamik Irak Lasiri* (ISIS) finn kumans pran kontrol militer lor enn gran siperfisi an term zeografik – enn seksyon dan Lirak ek enn seksyon dan Lasiri. IS, li ena so prop surs finans asterla. Li vann \$1 - 3 milyon petrol par zur depi pwi li kontrole dan sa 2 but sa 2 pei kot li fini pran enn kontrol. Alor, li ena larzan. Li ena zarm sofistike. Li ena transportasyon. Li ena enn spes ideoloji. Li pe met enn spes lalwa relizye. E li pe amenn destriksyon dan sa 2 rezyon la, e finn kumans lans atak lezot plas: Beirut, Paris, Bamako, amizir li pe sibir enn-de esek militer dan rezyon li kontrole, sirtu depi Larisi finn rant dan Lager kont li. Anmemtan, ISIS ena enpe siporter partu-partu dan lemond, par exanp, parmi bann zenn dan kartye mizer dan Pari ek Brixel.

Enn zafer ki finn res enn mister: ziska tu dernyerman, ni Obama ni Hollande, ni zot medya meynstriym, pa ti pe poz okenn kestyon lor kot ISIS vann so petrol, ni lor kot li gayn so zarm. Zot tu finn chom tayt (Taler nu revinn lor la).

Me, kimanyer ISIS finn vinn otan for? E, aparaman osi for osi vit? Anfet, ISIS li enn seksyon disidan ki ti sorti dan Al Qaida, e finn sezi lokazyon sa larwinn dan sa 2 pei la, pu li vinn byin for byin vit. E, malerezman, sa kalite zafer ti previzib, etan done aksyon sirtu USA, me osi UK ek Lafrans, dan zot zeo-politik kriyel ek danzere dan Mwayin Oryan.

Anfet, sa ranforsisman drastik ISIS, li finn anzandre direktman par politik US, avek kudme Gran Bretayn ek Lafrans. Pa zis LALIT ki pe dir sa. Ena, par exanp, enn ex-azan CIA apel Graham Fuller ki finn dir ISIS li “*made in America*”. E par sa, li pe dir, e li vre, ki ISIS finn kree par politik agresif militer ki sirtu USA pe amene dan Mwayin Oryan, enn politik pu protez lintere konpayni kapitalist dan surs petrol ek larut petrol dan sa rezyon la, odetriman tu lezot konsiderasyon.

Bombardman Lirak

Sa vedir, anu pran lexanp Irak. Bush ek Blair invariant tu kalite mansonz – ki mem Blair finalman admet mansonz – pu izol, bombard e invayir Irak, desann Saddam Hussein. Zot bombard pei, detrir li net. Zot tuy par santenn milye dimunn. Lerla, antan ki Larme Lokipasyon, zot separ pei la an parti politik sektarist, setadir kominal, Sunni e Shiit, finans lorganizasyon kominalo-relizye la, sirtu Sunni. E sa divizyon la, li pran. Li pran an-parti lakoz sutyin US pu reyn diktater Larabi Saudit, ki li, li ansarz export sa versyon radikal Islam, depi lontan, setadir Wahabism, Salafism, enn doktrinn aryere dan kuran Sunni, ki alabaz IS. Azut ar sa koktel la lefet ki US finn arm e finans Mujahidinn, dabor dan Afganistan – a lepok pu rekil Larisi – e sa finn kree enn spes larme anbilan permanan bann Jihadist, ki metamorfoze, dabor an Al Qaida, answit ISIS – e finn traverse depi Lazi, atraver

Mwayin Oryan, ziska Lerop, dabor dan ex-Yugoslavi, asterla an Frans, e mem dan Nor Lafrik. E sa bombardman, kuple ar lamonte integris debride, finn provok enn kriz refizye imans. Plis ki 2 milyon refizye Lasiri an Latirki. Plis ki enn milyon dan Liban, ek pre enn milyon dan Zordani. Plis sa but ki nu finalman truve lor televizyon – kan li ariv dan Lerop.

Bombardman Lalibi e Lasiri

Dan Lalibi ek Lasiri, zistwar la li enn trazedi similer ar Lirak: Bizin tir Khadafi, US, Lafrans, UK dir. Bizin tir Al-Assad, zot dir, alor fer enn aksyon 2 lapat krab, parey kuma pu Lirak: bombarde depi avyon ar enn lapat krab e finans “rebel” ar lot. Kan fini detrwir sosyete, so sivilizasyon an lafime, tu seki reste se bann grupman kominalo-relizye ki US e so alye finn arme ek finans. Lerla, tro tar.

Ariv Vandredi 13 Novam 2015, samem ISIS, li return kont so met kuma enn “*blowback*”, li return sa dife destrikter la, lor Pari – me, pa kont so militer, kont so lepep. Parey kuma US-UK-Lafrans finn fer lepep dan Lirak, Lalibi ek Lasiri pey lepo kase.

Lor *Radio Plus* Vandredi 20 Novam, ti ena enn program Jean Luc Emile kot Joel Toussaint ti parmi invite, e li finn donn enn analiz lisid e 100% itil lor sa size la. Li finn dir kimanyer li inportan pu get lefe sa zeo-politik e sa politik intern Lafrans, pu konpran sa bann atak terorist an Frans.

Depi lerla, nu finn truv nuvo kontradiksyon sorti otur Latirki. Latirki, li dan NATO. E, kan so avyon finn desann enn avyon Larisi, ki finn tom dan Lasiri, enn seri laverite inn kumans deor. Putin finn dir ki so bann avyon ti pe vey tiyo petrol ki pe kit Lasiri dan rezyon kontrole par IS. Alor, suzantand, se Latirki, ki dan NATO, ki pe pran livrezon sa petrol la, ekul li dan marse Oksidantal. E kan, avyon Larisi pe al gayn sa prev la, lerla

Latirki finn desann li – mem li pa sir li ti lor teritwar Latirki – e finn tuy so pilot kan li finn ezekte. Dezyem pilot finn sape, e li dir zame pa ti ena avertisman, ti zis desann zot avyon.

Antuka, Lafrans inn sanz so politik anver Lasiri, finn aliyn li ar Larisi. Li nepli pe exziz ki tir Bashir Al Assad, me pe dir priorite se fini ISIS.

Me, mem avek sa sanzman la, kapav li deza tro tar pu fini ISIS dan sa fason la. Zeo-politik ki US-UK-Lafrans pratike finn deza detrir sosyete Lasiri a enn tel degre ki li inposib lepep Lasiri kontrol so prop Guvernman. Anmemtan, pandan 40 an, Loksidan finn finans diferan grup Jihadist, e pli gran alye Rezyonal pu Loksidan, Larabi Saudit, li osi, pe kontiyn finans ek arm ISIS ek lezot rebel dan Lasiri. Alor, destriksyon pe kontiyne.

Enn lartik John Pilger finn dekrir kimanyer USA finn kumans sa kalite zeo-politik, baze lor bombardman depi avyon, dan Kanbodj an 1969. Alepok, se sa ki finn nuri sa mons apel Polpot laba, parey kuma an 2003 ek ziska 2015 so bombardman depi lao lor Lirak ek Lasiri pe nuri ISIS laba. [<http://johnpilger.com/articles/from-pol-pot-to-isis-anything-that-flies-on-everything-that-moves>] Alepok, li ti Sekreter Deta Henry Kissinger ki ti lans sa zeo-politik la ar so fraz: *Servi tu seki anvole lor tu seki buze!* Ala kot sa enn kote lapat krab ti kumanse, kuma enn stratezi barbar. E, 10-an plitar, US ti lans Loperasyon Siklonn, kot li finn kumans finans bann Mujahidinn dan Afghanistan. Lot kote lapat krab, ki konplet enn stratezi baze lor barbari mem.

E sa explik kot ISIS sorti. Pu fini ar li, pa osi fasil ki sa. Presizeman parski US-UK-Lafrans finn detrir sosyete ki ti kapav met lord ladan. Bann ansyin sosyete milener.

Tusala montre irzans lalit pu sosyalism, e pu fini ar sa reyn kapitalist ki osi avar ek aveg.

Kisannla baking ISIS ?

Larabi Saudit

Depi 2006, Larabi Saudit, lor lord USA, ti kree Leta Islamik Lirak (al Qaeda) pu anpes Irak koste ar Liran. An 2011, li finn furni zarm pu insireksyon dan Daraa, Lasiri. Li finn finans ek arm preske tu Islamist arme dan Lasiri, an-gardan zot divizyon ek zot dependans pu anpes zot azir dan enn fason otonom.

Latirki

Latirki donn pasaz tu Islamist depi partu dan lemond pu zot rant dan Lasiri. Ansam ek Larabi Saudit, li finn kree Jabhat al Nusra (al Qaeda), enn koalision apel “Larme Konket” pu invahir Lasiri 2015. Ladireksyon Islam-ist rest dan Latirki. Li kordinn lavant petrol ki ISIS finn vande. Anfet Bilal Erdogan, garson sef deta, li ansarz sa biznes petrol la. Latirki osi akord tretman medikal pu ISIS.

Qatar

Depi 2011 li finn investi par milyar dolar dan Konfreri Mizelman, ki liye ar grup Islam-ist kuma Farouq (FSA). Apre 2013, Qatar finn baking sa koalision apel “Larme Konket” e finn travay pros ar lax Latirki-Arabi Saudit.

Izrael

Izrael furni zarm ek tretman medikal a tu militan Islamist dan Lasiri, inklir Nusra ek ISIS. Li ena pwin kordinasyon lor Golan.

UK & Lafrans

Zot furni zarm “rebel” Islamis, ki travay ar diferan regroupman otur al Qaeda, zot livre zot zarm, e ed zot kree lyin ansam.

USA

Lamerik li sef jaz ki donn lord e li kordinn tu seki lao. Li servi so bann baz militer dan Latirki, Zordani, Qatar, Lirak, Larabi

Saudit. Li furni zarm tu rebel Lasiri, ki byin vit rant dan ISIS. Li pus ISIS lwin ar landrwa Kird me li permet zot atak Lasiri. Servis sivil Lirak dir ofisyelman ki US larg ravitayman pu ISIS atraver zot avyasyon.

(Sertin linformasyon dan sa bwat la pu dan enn nuvo liv *The Dirty War on Syria* par Tim Anderson.)

LEROP FAS-A KRIZ REFIZYE

An 2015, lemond an antye, atraver Medya Oksidental, finn viv “Kriz Migran” dan Lerop. Li enn trazedi lor gran lesel. Tulezur e ankor zordi, tu medya (sirtu televizyon oksidental) finn, e pe kontiyn, bombard nu avek zimaz par milye refizye pe sufer, amizir zot pe fwir zot pei, pe rod rant dan Lerop, pe servi tu mwayen posib e parfwa par riske zot prop lavi lor lamer e dan freser amizir liver pe koste.

Fas-a sa, Lerop finn retrutv li dan enn sitiasyon kriz. Li pa pe kapav fer fas a sa gran nomb refizye la. Ena sertin pei Lerop kot lepep finn uver lebra, dir refizye “Vini!”. Ena sertin pei kot ena enn franz dimunn ase fasizant anti-refizye. Diferan pei dan Lerop finn met anplas enn politik frontyer ase dir. E asterla Lerop pe vinn lor enn sistem “kota” migran par pei. Alor, tusala pu dir li enn kriz grav.

Me, kot tu sa fami an-detres sorti? Ki zot pe fwir kumsa?

Anfet sa “kriz migran” la li enn la-ironi trazik, parski sitiasyon ki finn provok li, li finn kree par bann pei Oksidental mem. Sirtu zeo-politik Lamerik ki provok sa kalite kriz imin la, me avek konplisite Lerop, sirtu Lafrans, Langleter. Kan USA, UK ek Lafrans al bombard pei kuma Lirak, Lalibi, Lasiri, avek enn bi pu tir Saddam Hussein, Khadafi ubyin Al-Assad, sa bombardman ayreyenn kree enn dezord sosyal inimazinab, e provok emigrasyon forse, an-mas. Anmemtan, USA, UK ek Lafrans finn finans e arm militerman tu kalite “rebel” dan sa bann mem pei ki zot pe detrir la, e sa bann mem “rebel” ki rekonstitye zot-mem an ISIS. Sa kalite stratezi Oksidan la ena enn dub lefe ki enn kote li kree kriz migrasyon e de lot kote li provok atak teroris depi bann formasyon ki finn esansyelman kree par bann Leta inperyalis zot-mem, kuma ISIS e avan li, Al-Qaeda.

Laverite lor sif kriz migrasyon

Me, ena enn lot zafer ki grav. Sa kriz migran dan Lerop, li ase modest konpare ar kriz imans dan pei buku pli mizer, avwazinan. Komye dimunn finn deplase, finn bizin kit zot lakaz, zot lavil, zot vilaz, zot fami, akoz bann bombardman depi bann pei inperyalis ek akoz lager ki pei inperyalis finn deklanse otur petrol ek lezot mineral? Get vre sif o-nivo mondyal ki sa tablo anba la montre:

Pli sokan ankor, se zis sa kriz

TAB NIMERO ENN

Nomb dimunn ki finn deplase (refizye dan zot prop pei e andeor)	62 milyon
Nomb refizye dan enn lot pei	20 milyon
Nomb dimunn deplase an intern	40 milyon
Nomb dimunn ki lor “Waiting List” pu gayn lazil, sirtu dan lwes	2 milyon

Surs: Refugee Statistics 2014 UNHCR

Sa tab la montre komye refizye ena dan lemond. Nu bizin konpar sa bann sif la avek sa 700,000 dan 34 pei Lerop.

ki Lerop pe sibir, setadir dimunn ki pe fwir depi Lirak, Lasiri ek Lalibi, li finn fer buku plis refizye dan lezot pei andeor Lerop ki dan Lerop: Get Tabn a-drwat.

1 **Lasiri** - kot depi 2011, Lamerik finn furni zarm a bann “rebel” kont rezim Bashar Al-Assad. Depi Septam 2014 ziska zordi, Lamerik ansam avek Lafrans, Langleter, Denmark ek lezot pei Mwayen Orian (Qatar, Bahrein, etc) finn bombard Lasiri depi avyon. Asterla, bombardman finn intansifye avek kudme Larisi, enn kote, (antan ki alye Al-Assad), ek, lot kote, an revans pu atanta dan Pari an Novam 2015. Sityasyon pa paret pu dekante desito laba. Okontrer, bann mem destriksyon pu kree bann mem problem migran. Li enn serk visye.

2 **Lirak** – kot finn ena okipasyon militer USA depi invazyon 2003 ek avek buku kudme depi Langleter. Depi 2014, bann Amerikin ansam avek bann pei Lerop finn re-kumans bonbard Lirak.

3 **Afganistan** – ki finn sibir enn invazyon militer depi 2001 (swit-a atanta 11 Septam dan Lamerik) – pe tuzur sibir atak ziska 2014.

Anfet dapre enn dokimanter BBC, ant Zanvye ek Septam 2015, finn ena 710,000 refizye ki finn ariv Lerop. Sa det fini ariv enn milyon asterla. Me, sa li dan 28 pei Linyon Eropyin. Tandji ki, dan Latirki tusel, enn vwazin Lasiri, li pe deza eberz 2 milyon refizye, Liban, enn lot vwazin, plis ki enn milyon ek Zordani, enn ti pei, 800,000. Zot tu refizye dan samem kriz aktyel ki pe frap Lerop.

Get kimanyer lezot pei, apar Lerop, finn akeir buku plis refizye ki Lerop li mem:

E, dan lezot parti lemond, get sif pu refizye, ankor enn fwa, provoke byin suvan par lager

TAB NIMERO DE

LATIRKI	2 MILYON REFIZYE
LIBAN	1.5 MILYON REFIZYE
IRAN	1 MILYON REFIZYE
ZORDANI	800,000 REFIZYE

Surs: Refugee Statistics 2014 UNHCR

Sa tab la montre nomb refizye dan pei avwazinan ar Lasiri, Ankor enn fwa, rapel ki dan Lerop 34 pei pe partaz 700,000 refizye.

Oksidan (Get tab 3 anba).

Propagann u lpokrizi?

Klerman, zordi, Lerop pe servi medya pu fer li mem pas pu “viktim”. Li pe fer Lerop paret viktim enn flix migran ki pe rod rant dan Lerop pa-konekifer, kan an realite, ena enn lot laverite.

Lerop, ansam ek USA, pe anmemtan provok sa deplasman an-mas trazik la, par so zeopolitik, anmemtan pran mwins refizye ki lezot pei, kuma Latirki, Liran, Liban, Zordani.

Ek Lamerik dan tusala? Lamerik ki pli gran instigater sa bann bombardman la, finn anonse an Septam ki zot pu aksepte 10,000-15,000 refizye par an. Ena Leta dan US, kot so Guverner inn dir zot pa pu aksepte okenn refizye. Enn kestyon ki poze se komye letan ankor lepep Lerop pu kontiyn permet zot Guvernan azir kuma enn solda lwayal pu Lamerik e sibir, limem, ditor direk ek indirek politik militer Lamerik? Komye letan lepep USA pu permet so Guvernan sem dezord kumsa? E komye letan, nu, lepep partu dan lemond, pu toler sa kalite dominer la?

Nu bizin, ansam, dan enn lelan internasyonalist, viz pu sanz sosyete denn fason konstriktif. Ase sa lepok kot nu konplis dan vize pu asuvir lintere ek

konvwatiz bann Leta kapitalis. Ase sa politik ki pe amenn destriksyon, amenn lamonte integrism kuma dan Afganistan, Lasiri, Lirak, e kreasyon bann muvman extremis kuma ISIS. Lepok pu enn gran lalit pu sosyalism li lor azanda zordi.



Desin Raoul Dufy, Violonceliste

TAB NIMERO TRWA

PAKISTAN	1.5 MILYON REFIZYE
ETHIOPIE	700,500 REFIZYE

50 AN DEPI MASAK PAR LETA FASIST KI TUZUR LA

SK Buku dimunn pa kone lor masak ki ti fer dan Lindonezi an 1965, kan enn kudeta ti devye Prezidan Sukarno, met dibut enn reyn militer su Suharto, enn Leta ki finn res tuzur anplas. Seki terib dan ka sa masak la, se bann eskadron lamor desantralize, finn res fyer de seki zot finn fer. Zot finn telman vant zot-mem ziska fek la, ki sineas Joshua Oppenheimer an 2013 finn fer enn fim (ki'nn gayn buku pri) apel *The Act of Killing (Ak Tuye)*, enn dokimanter kot bann eskadron lamor, inklir bann seki tuzur Lemer, finn dekrir exakteman kimanyer zot finn perpetre bann masak. Telman zot viv dan inpinite, zot finn fer teat pu montre o-kler ki zot finn fer. Dan Fim K-Lib Gran Rivyer, ti get sa fim la, e an Desam finn get enn 2yem lor mem size, seki viktim ki finn sirviv, e fami seki'nn mor, inn rakonte, *The Look of Silence (Laparans silans)* ki fek sorti, par mem realizater.

Listwar sokan me vre

Prezidan Sukarno ti samem lider, ki ti met dibut *Muvman Non-Alyne*, ansam ar Prezidan Lezip Sadat, Premye Minis Lend Nehru ek Prezidan Yugoslavi Tito. Li ti enn nasyonalist dan enn reyn ase benevol, an-alyans ansam ar Parti Kominist Indonezi (PKI). Me, Leta Zini pa ti ditu dakor avek sa Guvernman la, e sirtu avek grander so Parti Kominis ki ti enn-de bann pli gran dan lemond, e byin inplante atraver bann koperativ alabaz, bann ti-brans dan sak vilaz.

Enn lel dan Larme ansam ar bann band fasist finn prosed a tuy ant 500,000 ek 1,000,000 manb Parti Kominis ek dimunn ki larme ti ule tuye alor finn apel "kominist". Seki ti karakteriz sa masak la, ki diferansye li depi

fasism dan Lalmayn Hitler par exanp, se li ti perpetre par bann vizilante lame-lame, sirtu ar kuto ek sab.

Rol CIA ladan finn tultan byin koni, mem si zot ti niye zot rol pandan enn tan. Ala seki enn reportaz ase meynstriym dan Wikipedia dir: *Malgre konsansis o-some leta US ek leta UK kumkwa li ti neseser likid Sukarno ("to liquidate Sukarno," minits CIA 1962) e malgre lexisans kontak raprose ant seksyon anti-Kominist dan larme Indonezi ek establishmennt militer US (inklir antrennman par Larme US 1,200 ofisyete, "o-grade parmi", malgre furnisaz armaman ek finansman a larme Indonezi, CIA niye ki li ti aktivman partisip dan masak la. Me, plitar li ti anfet devwale ki Guvernman US ti donn eskadron lamor lalist byin detaye tu kominist. Enn rapor top-sekre CIA dekrir masak la kuma "klase enn-de bann pli pir dan 20yem Syek"*.

Sa tuyeri la ti perpetre, avek konivans US, omilye Lager Vietnam (1955-75). E li enn lexanp sa kalite dezord ki Loksidan donn kudme seme. Ziska ler, Indonezi inn res enn pei tromatize, ante, sikatrise par sa tuyeri la, e par Leta ki tuzur anplas.

LCC



Sketch Picasso pu Guernica

ENN LARUT, ENN SINTIR

Lasinn pe devlop enn nuvo politik pu etann so sistem simerel – trin ki rul a 300 kilomet-er – atraver Lazi Santral ek Lerop ek Larisi, ek enn nuvo sintir lamer ki travers Losean Pasifik ek Indyin ziska Mediterane. Ondir li pu reprezant enn nuvo "Larut Laswa".

Depi Septam 2013, dan enn seri diskur ofisyel, dirizan Lasinn finn anons Lakor Internasyonal ar plizir pei dan sa plan la: Simerel pu travers Lazi, inklir Myanmar, Bangladesh, Lend, Tajikistan, Liran, Larabi Seodit, ziska Lerop, e pu travers e liye ansam Indonezi, Lend, Maldiv, Lafrik des Les ek Lerop par travers Losean Indyin ek Kanal Suez. Pu fer sa Lasinn finn met dibut enn gran gran Labank apel *Asian Infrastructure Investment Bank*. Pli etonan, se Minis Finans Britanik, Osborne, finn anonse ki zot osi ule sa zar sistem trin dan lenor Langleter (kordon indistriyel UK), e Nuvel Zeland finn osi rant manb ladan.

LCC

Surs: Bertrand Russell Peace Foundation so Revi *The Spokesman*, Nimero 150, 2015.

FRON NASYONAL ENN LAMONTE DANZERE

Apre atanta Pari 13 Novam, e malgre lamonte relatif Parti Sosyalis, ariv Eleksyon Rezyonal le 6 Desam, Parti dextrem drwat Fron Nasyonal Marine Le Pen finn sorti pli gran parti dan Lafrans (28%). Apre lextrem drwat, dezyem pli gran se ladrwat Sarkozy (27%). Parti Sosyalis sorti selman 3yem avek 23%. Alor, sa rezilta la azut dan move sekel atanda Pari. Dabor finn ena represyon ek Leta Dirzans. Answit, finn ena depite UK vot anfaver bombard Lasiri. Asterla, lamonte lextrem drwat Lafrans.